


5
CHINESE - JAPANESE COLLECTION
HARVARD COLLEGE LIBRARY
DEPOSITED BY
HARVARD - YENCHING INSTITUTE
FEB 7 1935

T2700/2231



元史類編卷之十

仁和邵遠平戒山學 南沙席世臣郢客氏校刊

哈佛大學漢和

天王八

順帝諱妥懽貼睦爾明宗庶長子也初太祖取西北諸國有阿爾
斯蘭者舉國來降太祖封為郡王俾領其部族明宗北狩過之納
其女罕祿魯氏名邁來廸以延祐七年四月丙寅生帝于北方有云

帝本瀛國公所生明宗過其地乞以爲子并載其母邁來廸以歸者

文宗至順元年明宗后八不沙被讒遇害

乃以帝乳母夫言明宗在日素謂長子非已子命翰林書其事於

史館遂徙帝之高麗令居大靑島中不與人接閱一載復召奎章

閣學士虞集使書詔播告中外再移帝于廣西之靜江三年八月

文宗崩燕鐵木兒請立文宗子燕帖古思文后不從乃立帝弟懿

璘質班在位二月殂燕鐵木兒復請立燕帖古思后曰吾子尚幼

當大福恐不任妥權貼睦爾在廣西今年十三矣且明宗長子義當立命中書右丞濶里吉思迎帝于靜江至良鄉具鹵簿迓之燕鐵木兒既見帝並轡徐行具陳所以迎立意帝幼且畏之一無所答燕鐵木兒以帝意難測尼之適太史亦言帝不可立立則天下亂以故議未決遷延者數月國事皆決於燕鐵木兒啟中宮取進止俄而燕鐵木兒歿后乃與大臣定議立帝且與帝約曰萬歲後其傳位於燕帖古思若武仁故事癸酉夏六月己巳帝卽位於上都詔曰洪惟太祖皇帝受命於天肇造區夏世祖皇帝奄有四海治功大備列聖相傳丕承前烈我皇祖武宗入纂大統及致和之季皇考明宗遠居朔漠天歷皇帝戡定內難讓以天下不幸皇考賓天天歷復正宸極治化方隆奄棄臣庶今皇太后召大臣燕鐵木兒伯顏等曰昔濶徹伯脫脫木兒只兒哈郎等謀逆以明宗太

子爲名又先爲八不沙始以妒忌妄構誣言疎離骨肉逆臣等旣正其罪太子遂遷于外先帝後知其妄尋至大漸顧命有曰朕之大寶其以兄子繼之時以朕遠在南服奉朕弟懿璘質班登大位以安百姓乃遽至大故皇太后體承先帝遺意謂朕武宗之元孫明宗之世嫡以賢以長在子一人遣使迎還徵集宗室諸王來會合辭推戴今念皇太后勉進之篤宗親大臣懇請之殷以至順四年六月日卽皇帝位可大赦天下於戲惟天惟祖宗全付予有家慄慄危懼若涉淵冰罔知攸濟尚賴宗親臣鄰交修不逮以底隆平辛未命伯顏爲太師右丞相仍設左丞相以太傅撒敦爲之命諸官不得兼領三職秋七月己亥太陰犯房八月壬申立燕鐵木兒女伯牙吾氏爲皇后詔官員自省院臺外不許遞升致礙選法九月甲午太陰犯填星乙未犯天江己未犯氏冬十月甲子太陰

犯斗戊辰改元詔曰在昔世祖紹開丕圖稽古建元立綱陳紀列
聖相傳恪遵成憲肆予冲人嗣大歷服茲圖治之云初嘉與民以
更始乃新紀號誕告多方其以至順四年為元統元年於戲一元
運於四時惟裁成之有道大統綿乎萬世思保障於無疆癸酉雲
南僂羅土官渾鄧馬弄來貢升其地為散府丁丑依皇太后行年
之數釋罪囚二十七人庚辰奉天歷皇帝及太皇太后御容於大
承天護聖寺命撒敦兼隆祥院使主奉祀戊子封撒敦為榮王唐
其勢襲父封太平王十一月辛卯朔罷富州金課甲午太陰犯壘
壁陣辛亥復立江西湖廣江浙河南權茶運司志云其種有末茶有葉茶
按茶之為用始于唐皆以
細末製為餅臨用而碾
之其後葉茶之行始盛
紀作下時寢廟未建暫於英宗室次結綵殿奉安神主封伯顏為秦
王是日秦州山崩地裂夜太陰犯太微東垣上相壬子犯填星癸

丑犯亢罷河間大報恩寺諸色人匠總管府十二月乙丑廣西猺
寇湖南道州千戶郭震戰死癸酉太陰犯鬼乙亥為皇太后置徽
政院設官三百六十六員是夜太白犯壘壁陣太陰犯軒轅己卯
犯進賢癸未犯東咸是歲廷試進士增及百人左右榜各三人同
同李齊等皆賜進士及第科舉取士莫盛于斯

元統二年甲戌春正月庚寅朔雨血于汴梁著衣皆赤辛卯以脫
別台平章政事戊戌四川大盤洞蠻謀谷什用來貢卽其地立盤
順府是夜太陰犯軒轅庚戌犯房甲寅罷廣教總管府立行宣政
院于杭州二月己未朔詔內外興舉學校戊辰封也真也不干為
昌寧王以陰陽家言停造作四年癸酉太陰犯太微東垣上相太
廟木陞壞丁亥太白經天三月己丑朔詔科舉取士國子學積分
膳學錢糧儒人免役悉依累朝舊制學校官選有德者補充辛卯

太陰犯填星癸巳廣西徭賊復起殺元帥掠庫物遣右丞禿魯迷失將兵討之罷廣誼司復立覆實司癸卯月食既益都真定盜起選省院官往捕之募能擒盜者倍其賞獲三人者與一官壬子廣西慶遠徭賊寇全州丁巳詔蒙古色目人犯奸盜詐偽者隸宗正府漢人南人犯者屬有司夏四月戊午朔日食壬申命唐其勢為御史大夫丁丑太白經天戊寅太白晝見己卯奉文宗神主升祔因有事于太廟躬行告祭樂用宮縣禮三獻壬午太白晝見錄許衡後以其孫從宗為異珍庫提點癸未立鹽局于京師官白賣鹽敕除累朝暮年忌日外不作佛事禁私剽寺觀菴院僧道入錢五十貫給度牒方聽出家五月己丑宦者李羅帖木兒傳皇后旨取鹽十萬引入中政院戊申封宗室蠻子為文濟王鎮大名雲南王阿魯鎮雲南詔王侯宗戚軍站人匠鷹坊控鶴但隸京師諸縣者

令一體應役贈故中書平章王泰亨諡清憲舊制三品以上官立朝有大節者得賜功臣號及諡時浸濫失

實惟泰亨在中書時安南請佛書以九經賜之使高麗不受禮遺為尚書貧不能自給故特賜是諡秋七月甲午太白晝見己亥太

白經天壬寅詔蒙古色目人仍行父母喪犯盜者免刺甲辰太白

經天帝幸楠木亭己酉太白晝見夜有流星大如杯色赤長五尺

餘光燭地起自天津沒於離宮之南庚戌太白經天壬子熒惑犯

鬼八月丙辰朔太白經天凡四日戊午祭社稷自是復舉上戊之典癸亥太白

經天辛未以災變赦天下京師地震鷄鳴山崩陷為池方百里己

卯太白犯軒轅九月庚寅太白經天壬辰太陰入南斗癸巳太白

犯靈臺甲午徭賊陷賀州命廣西宣慰使章伯顏帥八番義從軍

擊之壬子太白犯太微垣冬十月乙卯朔定內外官朝會儀班次

一依品從辛酉以許有壬參知政事癸亥太白犯太微東垣上相

復犯進賢丁卯立湖廣黎兵屯田萬戶府統千戶十三所增置武

安縣乙亥太陰犯軒轅太白犯填星已卯上皇太后尊號曰贊天
開聖仁壽徽懿昭宣皇太后詔曰朕登大寶君臨萬方永惟太母
擁佑之勤神器莫安海宇寧謐實慈訓之致然也爰協衆議再舉
徽稱而皇太后以文宗未祔太廟至誠謙抑弗賜俞允今告祔禮
成亦既闋歲乃以吉日奉上尊號思與普天同茲大慶可大赦天
下免今年田租之半內外官四品以下減一資癸未定真哥皇后
配饗武宗是爲宣慈惠聖皇后十一月戊子發兩艘船下番爲皇
后營利乙未填星犯亢庚戌熒惑犯太微垣是歲河南湖北旱自
三月不雨至于八月淮水灤河漆河溢江浙大饑賑米六萬石鈔
二千八百錠罷太廟夏秋二享
至元元年乙亥春二月甲寅朔帝將田柳林從臺臣諫遂止丁巳
立縹甸散府及穆山甸范陵甸二長官司甲戌熒惑逆行入太微

三月癸未朔遣五府官決天下重囚敕丞相已領軍國重事省院
臺官俱不得兼領各衛貴州平伐都勻定雲蠻長寶郎天都蟲等
來降卽其地立宣撫司丙申以甘州路十字寺奉安世祖皇帝母
別吉太后於內議定祭禮別吉應是莊聖太后別號丁酉月食罷采高麗媵女甲辰
免山東河間兩淮福建新增鹽課十八萬五千引以徹里帖木兒
平章政事王結參知政事夏四月癸丑朔廢霑益州所轄羅山石
梁交水三縣詔諸官非節制軍馬者不得佩金虎符壬戌太陰犯
左執法已卯命翰林國史院纂修累朝實錄及后妃功臣列傳庚
辰罷功德興瑞營繕集慶翊正羣玉繕工金玉珠翠諸提舉司五
月壬午朔遣使祭曲阜孔子廟癸卯太陰犯壘壁陣甲辰命唐其
勢爲左丞相時兼教六月壬戌太陰犯心庚辰唐其勢憤伯顏專政
謀立諸王晁火帖木兒伏兵東郊率勇士突入宮伯顏執之及其

第塔刺海皆伏誅并執皇后伯牙吾氏幽之別所秋七月辛巳朔以馬扎兒台阿察赤爲御史大夫壬午伯顏弑皇后伯牙吾氏于開平民舍諸王晁火帖木兒自殺乙未太陰犯壘壁陣壬寅專命伯顏爲右丞相罷左丞相不置戊申誅答里及阿察赤等于市詔曰曩者文宗皇帝以燕鐵木兒嘗有勞伐父子兄弟顯列朝廷而輒造事覺出朕遠方文皇尋悟其妄遺命傳位於朕燕鐵木兒貪利幼弱復立朕弟不幸早歿丞相伯顏追奉遺詔迎朕於南旣至大都燕鐵木兒猶懷兩端遷延數月天隕厥躬伯顏等同辭劾戴乃正宸極後撒敦答里唐其勢相襲用事交通宗王晁火帖木兒圖危社稷阿察赤亦嘗與謀今幸以次掩捕明正其罪元克構難貽我太后震驚朕用兢惕永惟皇太后後其所生之子一以至公爲心親挈大寶昇予兄弟迹其定策兩朝功德隆盛近古罕比雖

嘗奉上尊號揆之朕心猶爲未盡已命大臣特議加禮伯顏爲武宗捍禦北邊翼戴文皇茲又克清大憝明飭國憲爰賜答刺罕之號期於子孫世世永賴八月辛亥朔熒惑犯氏癸亥以岐陽王完者帖木兒知樞密院事帖木兒不花並爲御史大夫己卯議尊皇太后爲太皇太后許有王諫以爲非禮不聽九月丁亥封濶里吉思爲宜國公定住爲宣德王是夜太陰犯斗庚寅犯壘壁陣丙午改烏撒烏蒙地仍隸四川冬十月甲寅熒惑犯南斗丙辰加塔失海牙太尉商議中書省事塔失帖木兒爲太禧院使議軍國重事丁巳安置御史大夫完者帖木兒于廣海甲子太陰犯昴丁卯犯斗戊辰太白晝見徹里帖木兒議罷科舉并減太廟四祭爲一御史呂思誠等十九人劾其變亂舊章不聽皆辭去惟陳允文不署名獨留十一月庚辰詔罷科舉以所在儒學貢士莊田租給宿衛

衣糧甲申太白經天乙酉敕內外官悉循資銓注毋得保舉滯滯
選法丙戌太白經天已丑辰星犯房丁酉以阿吉刺平章政事徐
奭定住並參議中書省事戊戌召前知樞密院事福丁失刺不花
撒兒不哥還京師初二人以帝未立謀誅燕鐵木兒為所誣貶故名之己亥太陰犯太微垣庚子犯
左執法辛丑以災異改元詔曰朕祇紹天明入纂丕緒于今三年
夙夜寅畏罔敢怠荒茲者年穀順成海宇清謐朕方增修厥德日
以敬天恤民為務屬太史上言星文示儆將朕德菲薄有所未逮
與天心仁愛俾予以治有所告戒與弭災有道善政為先更號紀
年實惟舊典仰惟世祖在位長久天人協和諸福咸至祖述之志
良切朕懷今特改元統三年仍為至元元年適遵成憲誕布寬條
庶格禎祥永綏景祚十二月壬子太陰犯壘壁陣壬戌命四川雲
南保舉蠻彝官以俟銓注乙卯加上皇太后尊號曰貞文慈佑儲

善衍慶福元太皇太后詔曰欽惟太皇太后承九廟之托啟兩朝
之業親以大寶付之眇躬尙依擁佑之慈恪遵仁讓之訓爰極尊
崇之典以昭報本之忱庸上徽稱宣告中外是夜太白犯軒轅夫
人星丙寅太白經天丁卯太陰犯右執法癸酉歲星晝見乙亥太
白歲星皆晝見丙子安慶蕪黃地震戊寅蒙古國子監成閏月乙
酉詔四川鹽運司仍于鹽井造鹽餘井聽民煮造收其課十之二
災惑犯壘壁陣壬辰命宗室脫脫木兒襲封荆王掌忙來諸軍戊
戌徹里帖木兒以罪罷流南安庚子太陰犯心壬寅犯箕癸卯犯
南斗是歲賜天下田租之半凡有妻室之僧令還俗既而復聽為
僧太廟惟舉夏秋二享
二年丙子春正月壬戌太陰犯右執法甲子犯角丁卯犯房宿松
縣地震山裂置都水庸田司于平江二月辛巳太陰犯昴甲申太

白經天丁酉追尊帝生母邁來廸爲貞裕徽聖皇后庚子析衡陽
立新城縣乙巳免甘肅兵在逃者罪聽復業三月壬戌太陰犯心
甲子犯箕乙丑犯南斗甲戌復四川鹽井之禁夏四月丁丑朔禁
民間私造格例戊寅封駙馬孛羅帖木兒爲毓德王丙戌太陰犯
角丁亥禁服麒麟鸞鳳白兔靈芝雙角五爪龍八龍九龍萬壽福
壽字緒黃等服庚寅以帖木兒不華平章政事王德懋爲中書左
丞撒廸爲御史大夫五月丙午朔黃河復故道庚戌太陰犯靈臺
丙辰太白晝見壬申秦州山崩六月戊子太白犯井禮部侍郎忽
里台請復科舉之制不聽湍河白河涇水皆溢秋七月己酉太白
犯鬼庚戌以定住鎖南參議中書省事乙卯太白犯熒惑禁口傳
敕旨濫支錢帛癸酉命駙馬月魯不花帖古思教化同鎮薛連可
怯魯連之地八月甲戌朔日食己卯太陰犯心辛巳犯箕壬辰立

屯衛于馬札罕之地庚子定強盜皆歿盜牛馬者剽盜驢騾者黥
額再犯剽盜羊豕者墨項再犯黥三犯剽剽後再犯者歿盜諸物
者照其數估價省院臺五府官三年一次審決辛丑併馬湖路泥
溪平彝蠻彝都沐川雷坡六長官司爲三九月庚戌熒惑犯太
微垣冬十月丙子熒惑犯左執法丁酉太陰犯昴己亥犯進賢詔
每日右丞相伯顏太保定住平章孛羅阿吉刺聚議于內廷平章
塔失海牙右丞鞏卜班參知政事納麟許有王聚議于中書十一
月己酉太陰犯壘壁陣丁巳遣河南平章玘珞普華至西番爲僧
安置宗王不蘭奚于梧州丁卯太陰犯房辛未禁彈弓弩箭袖箭
是歲以燕鐵木兒居第賜灌頂國師號大覺海寺塑千佛于其內
江浙旱自春至于八月不雨黃州蝗督民捕之人日五斗太廟惟
舉冬享

三年丁丑春正月癸卯廣東增城縣民朱光卿反偽稱大金國改元赤符癸丑立宣鎮侍衛屯田萬戶府于寧夏丙辰月食丁巳日有交暈左右珥上有白虹貫之戊午帝畋于柳林凡三十五日監察御史丑的宋紹明進諫帝嘉之賜金幣丑的等固辭帝曰昔魏徵進諫唐太宗未嘗不賞汝其受之封晉郭璞為靈應侯諡唐杜甫曰文貞二月壬申朔日食河南汝寧人胡閏兒號棒以燒香惑眾反于信陽州破鹿邑焚陳州屯營于杏岡丙子立船戶提舉司定船戶科差一千料以上者歲納鈔六錠下此遞減按志云額外之課凡三十有二歷日二契本三河泊四山場五密冶六房地租七門灘八池塘九蒲葦十食羊十一荻葦十二煤炭十三桶岸十四山查十五麴十六魚十七漆十八醋十九山澤二十蕩二十一柳二十二牙例二十九齒三十竹葦三十一蠶三十二白藥其船戶又在額外之外者復立採珠提舉司綱目云雨毛如線而三月辛亥太陰犯靈臺戊午立宏吉刺氏伯顏忽都為皇后因雨輟賀癸亥加封晉周處為英義武惠正應王是月天雨線

緣民謠曰天雨線民起怨中原地事必變夏四月癸酉禁漢人南人高麗人持軍器有馬者拘

入官甲戌有星孛于王良至七月壬寅沒于貫索辛卯太陰犯壘壁陣四川大足縣民韓法師反自稱南朝趙王廣東歸善縣民聶秀卿譚景山等造軍器拜戴甲為定光佛與朱光卿相結為亂庚子太白晝見詔省院臺部宣慰廉訪司及郡府幕官之長並用蒙古色目人禁漢人南人習蒙古色目文字五月辛丑民間訛言朝廷采童男女一時嫁娶殆盡壬寅太白犯鬼乙巳太陰犯軒轅戊申太白晝見壬子太陰犯心甲寅西番賊起殺鎮西王子黨元班蔓延二百餘處詔立行宣政院以也先帖木兒為院使討之戊午太白晝見己未太陰犯壘壁陣丁卯彗星見東北大如天船星色白長尺餘彗指西南凡六十三日自昴至房歷十五宿始滅六月庚午太白經天乙亥太白犯靈臺己卯犯太微垣御河黃河漳河

沁河渾河水並溢壬午太白晝見太陰犯斗丁亥太白犯太微垣

戊子加封尹真人為無上太初博文文始真君徐甲為垂元感聖

慈化應御真君庚桑子為洞靈感化超蹈混然真君文子通元光

暢昇元敏誘真君列子冲虛至德遁世樂游真君莊子南華至極

雄文宏道真君己丑太白晝見閱三十三日方息秋七月丁未車

駕幸龍岡灑馬漣以祭庚申詔除死罪重情必候五府官審錄答

杖以下聽有司依例決斷元制五刑之日凡七下至五十七為答府凡六十七至一

甲戌太陰犯心壬午京師地大震太廟梁柱裂各室墻壁壞壓損

儀物及文宗神主御床各寺神御殿壁仆損祭器自是累震者六

日癸未弛高麗軍器禁仍令乘馬凡漢人鎮遏生番處並開軍器

禁九月己亥熒惑犯斗甲辰太白犯斗丁未太陰犯壘壁陣己酉

修文宗神主玉冊及神御物成遣官告祭辛亥太陰犯軒轅冬十

月庚午太白晝見丙子太陰犯壘壁陣壬午犯昴丁亥犯鬼庚寅

太白晝見十一月丁酉太白經天戊戌太白犯亢壬寅太陰犯熒

惑癸卯犯壘壁陣丙午立屯田于雒州丁未填星犯鍵閉辛亥太

白犯五車甲寅犯鬼丙辰太陰犯軒轅丁巳犯太微垣癸亥發鈔

萬五千錠賑宣德地震死傷者十二月己巳歲星退犯天鴈填星

犯罰星甲戌熒惑犯壘壁陣太白犯東咸壬午集賢大學士羊歸

言太上皇唐妃影堂在真定玉華宮考元世稱太上皇者蓋唐宗也特唐妃無考每年宜于正

月二十日致祭從之加馬札兒台太保知樞密院鎮北邊伯顏請

殺張王劉李趙五姓漢人帝不從是年太廟四祭皆闕

四年戊寅春正月丙申以地震赦天下詔內外廉能官父母年七

十無侍丁者准附近銓注以便侍養癸卯太白犯建星丙午犯五

帝

車辛亥太陰犯軒轅己未填星犯東咸庚申太陰入南斗太白犯
 牛二月戊寅太陰犯軒轅己卯犯靈臺乙酉奉聖州地震三月戊
 申填星退犯東咸夏四月辛未京師雨紅沙晝晦以探馬赤只兒
 瓦夕平章政事脫脫為御史大夫己卯河南執胡閏兒械至京誅
 之癸巳帝如上都暮至八里塘雨雹大如拳其狀有小兒環玦獅
 象龜卵之形五月辛酉詔土番宣慰司軍士許乘馬執兵器分湖
 廣元領新化古州潭溪龍里洪州諸洞民六萬餘戶隸靖州增吏
 部考功司官以佛家閭為郎中喬林為員外郎魏宗道為主事考
 較天下郡縣官功過六月庚午袁州民周子旺反偽改年號尋被
 擒伏誅辛巳填星退犯鍵閉壬午立重慶路墊江縣漳州民李志
 甫反圍漳城守將擲思監戰失利秋八月癸亥朔日食丙子京師
 地震日一三次至乙酉乃止丁丑白虹亘天癸未改宣德府為順

寧府奉聖州為保安州雲南老告土官八那遣使賚象馬來朝立
 老告軍民總管府閏月己亥填星犯罰星庚戌太陰犯斗乙卯犯
 鬼贈湖廣平章燕赤永平王諡忠襄伯顏察兒奉元王諡忠宣太
 保曲出廣陽王諡忠惠平章伯帖木兒文安王諡忠憲濶兒吉思
 晉寧王諡忠襄九月丙寅太陰犯斗戊辰太白犯東咸癸酉奔星
 如盃大色白起右旗下西南行沒于近濁甲申太陰犯軒轅乙酉
 犯靈臺庚寅太白犯斗冬十月辛亥太陰犯酒旗十一月丁卯立
 紹熙府軍民宣撫都總司本府元領六州二十縣一百五十二鎮元初以其地
 荒而廢之至是居民多至二十餘萬故立府治之己巳
 熒惑犯氏丁丑太陰犯鬼戊寅犯壘壁陣十二月戊戌立邦牙等
 處宣慰司都元帥府并總管府初世祖既定緬地以其處雲南極邊就立其蠻
 長為帥今三年一入貢至是來貢故立官府庚
 子熒惑犯房壬寅以汪家奴知樞密院事別兒怯不花為御史大
 夫癸卯太白經天壬子熒惑犯東咸乙卯太白犯外屏太陰犯斗

丙辰太白經天是年江浙海運糧不足撥江西河南五十萬石補之信州靈山裂鞏昌府山崩太廟惟舉冬祭五年亦如之

五年己卯春正月癸亥禁濫予僧人名爵庚午太陰犯井乙亥熒惑犯天江二月庚寅信州雨土甲午太陰犯昴庚子免廣海新增

鹽課萬五千引壬寅太陰犯靈臺夏四月辛卯加封孝女曹娥為慧感靈孝昭順純懿夫人罷興州興安縣壬寅太陰犯日星五月

庚午太陰犯心壬申犯斗丙子太白犯昴六月壬寅月食甲辰熒惑退入南斗秋七月甲子熒惑犯南斗太陰犯房甲戌太白經天

詔諸王位下官毋入常選乙酉太白經天凡七日八月甲午太陰犯斗丁酉太白犯軒轅乙巳太陰犯昴冬十月壬辰禁倡優盛服

許男子裹青巾婦女服紫衣不許戴笠乘馬甲午命伯顏為大丞相加元德上輔功臣號伯顏矯殺郟王徹徹禿又奏貶宣讓王帖

木兒不花威順王寬徹普化不俟命輒遣去己亥熒惑犯壘壁陣

十一月戊辰杞縣人范孟反詐稱詔使至河南殺平章月祿帖木兒左丞刼烈廉訪使完者不花等已而捕誅之癸酉江西新昌州

雨水冰至明年二月始解十二月甲午太陰犯昴癸卯熒惑犯外屏是歲工部廳梁上出芝草一木七莖汀州大水漂民廬八百區

溺死八千餘人戶賑鈔半錠死者倍之濮州范縣冀寧桓州雲需府瀋陽等處饑共賑鈔二萬五千錠米七千餘石

六年庚辰春正月丁卯太陰犯鬼甲戌立司禮監改奉太祖太宗睿宗御容於石佛寺

以翰林院言祭所其隘故特造新影堂改奉之

乙亥太陰犯房二月己丑太陰犯昴丙申犯太微垣己亥黜伯顏為河南行省左丞相詔曰朕

踐位以來命伯顏為太師秦王中書大丞相而伯顏專權自恣欺朕年幼輕視太皇太后及朕弟燕帖古思變亂祖宗成憲虐害天

下加以極刑允合輿論朕念先朝之故尚存憫恤今出為河南行省左丞相所有元領諸衛親軍并怯薛歹人等詔書到時即許散

還輟耕錄云帝御玉德殿命史臣草詔有云各領所部詔書到日悉還本衛帝曰自早至暮皆一日日也可改日字作時字時伯顏以飛放為名挾皇太子燕帖古思在柳林意將犯分詔既成遣

平章只兒瓦友實至奉皇太子歸國各枝軍馬即時散去一字之繫利害如此命馬札兒台為太師右丞相辭不拜以

其子脫脫知樞密院事也先帖木兒為御史大夫壬寅詔諸王侯不得懸帶弓箭環刀輒入內府癸卯太陰犯心乙巳罷各處船戶及廣東採珠二提舉司丁未太陰犯羅堰戊申熒惑犯日星立延徽寺奉寧宗祀事己酉有星孛于房星大色白狀如粉絮尾跡長五寸餘慧指東南漸向西北行閱三十二日始滅三月甲寅漳州義士陳君用襲殺反賊李志甫授君用同知漳州府事癸亥太陰犯軒轅庚午犯房壬申犯南斗戊寅太白犯月星辛巳詔安置伯顏陽春縣未至歿于道夏四月庚寅立明宗神御殿碑于大天元

延壽寺以汪家奴平章政事鐵木兒塔識為中書右丞五月己未漳州龍巖尉黃佐才與李志甫餘黨戰妻子四十餘口皆遇害擢佐才為龍巖縣尹丁卯太陰犯斗丙子置月祭各影堂香於大明殿遇行禮令省臣就殿行香祭之六月丙申詔徹文宗廟主徙太皇太后不答失里于東安州放太子燕帖古思于高麗詔曰昔我皇祖武宗昇遐之後祖母太皇太后惑於憊慝俾皇考出封雲南英宗遇害正統寢偏我皇考以武宗之嫡逃居朔漠宗王大臣同心翊戴肇啟大事于時以地近先迎文宗誓總幾務繼知天理人倫所在假讓位之名以寶璽來上我皇考推誠不疑即授以皇太子寶文宗稔惡不悛當躬迓之際乃與其臣月魯不花野里牙明里董阿等謀為不軌使我皇考飲恨上賓歸而再御宸極海內聞之靡不切齒又私圖傳子乃構邪言嫁禍于八不沙皇后謂朕非

明宗子俾出居遐陬祖宗大業幾於不繼內懷媿歉則殺野里牙
以杜口上天不祐隨降殞罰叔嬪不答失里怙其勢欲舍冢嗣而
立孺稚奄復不年諸王大臣以賢以長扶朕踐位每念治必本於
盡孝事莫先於正名賴天之靈權奸屏黜永惟鞠育罔極之恩忍
念不共戴天之義其命太常徹去圖帖睦爾在廟之主不答失里
本朕之嬪母陰構奸臣弗體朕意僭膺太皇太后之號迹其閨門
之禍離間骨肉罪惡尤重揆之大義削去鴻名徙東安州安置燕
帖古思昔雖幼冲理難獨處朕終不陷于覆轍專務殘酷惟放諸
高麗當時賊臣月魯不花野里牙已歿其以明里董阿等明正典
刑太皇太后等暴崩燕帖古思亦中道遇害已亥成紀縣山崩地坼辛亥太白晝見夜犯歲星
秋七月甲寅詔封微子爲仁靖公箕子爲仁獻公加封比干爲仁
忠烈公丁巳太白晝見戊午以星文示異地道失寧蝗旱相仍

頒罪已詔於天下已未以亦憐真班爲御史大夫庚申太陰犯心

甲子犯羅堰戊寅命翰林奎章閣剛修大元統制名至正條格九

月癸丑加封漢張飛武義忠顯英烈靈惠助順王辛酉太白犯虛

梁丙寅詔有罪者毋籍其妻女丁卯太陰犯昴熒惑犯歲星甲戌

太陰犯軒轅冬十月甲申加上皇考尊號始親禱太室以太師馬

札兒台爲亞獻官樞密知院阿魯禿爲終獻官時帝在位七年未嘗一至太廟御史以爲言乃始行親祀

辛卯敕各愛馬人不許與常選愛馬人謂諸王所統之軍丁酉太白入南斗已亥犯

斗壬寅命脫脫爲右丞相鐵木兒不花爲左丞相十一月乙卯太

陰犯虛梁戊午熒惑犯氏甲子月食辰星犯東咸戊寅犯天江以

孔克堅襲封衍聖公十二月癸未太陰犯虛梁乙酉犯土公丁亥

熒惑犯鉤鈴乙未犯東咸是月詔復科舉取士制國子監積分生

員三年一次依科舉例入會試中者取一十八名罷天歷以後增

設太禧宗禋等院改奎章閣為宣文閣藝文監為崇文監環谷集云帝作宣文

閣于大明殿西北萬幾之暇御閣閱經史以左右儒臣為經筵官日侍講讀

至正元年辛巳春正月己酉朔改元詔曰朕惟帝王之道德莫大於克孝治莫大於得賢朕早歷多艱入紹大統仰思祖宗付託之重戰兢惕勵逮茲八年慨念皇考久勞於外甫即大命四海缺望夙夜追慕不怠於懷乃以至元六年十月日追上尊號曰順天立道睿文智武大聖孝皇帝被服袞冕裸於太室式展孝誠勉狗大禮慶成之請御大明殿受羣臣朝賀爰自去春疇咨于眾命馬札兒台為太師右丞相以正百官以親萬民等即控辭養疾私第再三敦諭勉令就位自春徂秋其請益固朕憫其積勞察其至誠不忍煩之以政俾解機務加封忠王其子脫脫早歲輔朕克著忠貞乃命為中書右丞相宗正鐵木兒不花嘗歷政府嘉績著聞為中

書左丞相並錄軍國重事夫三公論道以輔予德二相總政以弼予治可改至元七年為至正元年與天下更始甲寅熒惑犯天江庚申犯井辛未犯心癸酉犯斗詔天壽節禁屠宰六日甲戌太白晝見凡四日命永明寺寫金字經一藏二月己卯太白晝見癸巳太陰犯明堂三月庚戌罷兩淮屯田手號打捕軍癸丑撥屯儲禦軍于芍陂洪澤德安三處屯種己未汴梁地震罷河西務行用庫立廣福富昌二庫隸資政院復設衛衡司拱儀局司禮監夏四月丁丑道州土賊蔣丙等反破江華明遠二縣戊寅彰德有赤風自西北起晝晦如夜庚寅以鐵木兒塔識平章政事阿魯為中書右丞許有壬為左丞丁酉兩浙水免歲辦餘鹽三萬引庚子杭城火燬官民房舍幾盡輟耕錄云至正辛巳春江浙平章只理在台州入城之任衣紅衣民謠曰五間燒灰七十四人明年壬午四月火殃來矣至四月杭州火燬官民房屋公廨寺觀一萬五千七百五十尤甚數百年浩繁之地凋敝實基于此閏五月丁丑加封滹沱河神為昭佑靈

源侯甲午賞扈從明宗諸王官屬八百七人金銀鈔幣有差壬寅刻宣文至正二寶輟耕錄云上作一小爾二曰明仁殿寶二曰洪禧命楊瑀篆文洪禧璞純白而龜紐墨色六月戊午禁高麗及

民間以子為宦者避賦役庚午太陰犯井秋七月乙酉太陰犯填

星庚寅犯雲雨九月庚辰太陰犯建星壬午犯鉞星及井宿己丑

賜文臣宴于供辰堂冬十月甲寅以海運不給令江浙行省於中

政院財賦府撥賜寺觀田糧總運二百六十萬石乙卯歲星犯氏

丁巳太陰犯月星戊午月食既十一月丙子道州土賊何仁甫等

反庚辰分吏禮兵刑四部為二庫戶工兩部為二庫各設管勾一

員己亥太陰犯東井庚子犯天江十二月乙卯詔民年八十以上

者蒙古人賜繒帛餘各旌以高年耆德之名並免雜役丁巳太陰

犯壘壁陣己未立四川安岳縣癸亥以在庫至元中統鈔二百八

十二萬餘錠可支二年停造明年鈔本革王伯顏察兒等所獻檀

景等州產金地是歲山東燕南寇盜縱橫至三百餘處崇明通泰

等州海潮溢溺死千六百餘人賑鈔萬一千八百錠復行太廟四

時祭二年三年亦如之滇志云雲南玉案山產小赤犬羣吠遍野又兩鐵民舍山石皆穿人物值之多幾

二年壬午春正月丙戌開京師金口河深五十尺廣一百五十尺

役夫十萬人費用不貲卒無成功降咸平府為縣升懿州為路以

大寧所轄與中義州屬之戊子太陰犯明堂甲午熒惑犯月星三

月戊子太陰犯房夏四月辛丑冀寧路平晉縣地震裂地尺餘民

居皆傾庚申太陰犯羅喉罷雲南蒙慶邦牙二宣慰司五月甲申

太白經天東平雨雹如馬首六月戊申奪江浙撥賜僧道田還官

徵糧以備軍儲壬子濟南山崩水湧汾水大溢秋七月庚午惠州

羅浮山崩乙未太陰掩太白丁酉太白晝見以賀惟一為中書參

知政事辭不就拂郎國貢異馬長丈一尺三寸高六尺四寸身純

黑後二蹄皆白

圭齋集云帝御慈仁殿拂郎國進天馬敕周朗貌以為圖圖成上命揭俟斯為贊

八月庚子朔日食丙

午太白晝見九月己巳湖廣平章鞏卜班討道州賊平之復嶮峒

堡寨二百餘處丁丑太陰犯羅堰戊子犯井冬十月己亥朔日食

癸卯太陰犯建星甲寅犯天關壬戌遣官致祭孔子于曲阜甲子

權免兩浙額鹽十萬引福建餘鹽三萬引十一月甲申免雲南明

年差稅辛卯歲星熒惑太白聚于尾十二月己酉京師地震辛亥

阿魯禿滿等以謀害宰臣圖逆伏誅是歲大同饑人相食河間冀

寧等路水杭州火賑鈔三十萬錠

三年癸未春二月甲辰太陰犯井填星犯斗熒惑犯羅堰乙卯太

陰犯氏遼陽吾者野人及水達達皆叛為捕海東青煩擾故也三月戊寅詔作新

風憲在內官不法者監察御史糾劾在外官不法者行臺監察御

史糾劾壬午太陰犯氏敕修宋遼金三史以丞相脫脫為都總裁

官

綱目云或欲如晉書例以宋為世紀而遼金為載紀或謂遼立國先宋五十年宋南渡後當稱

史建炎後為南宋史各持議不決而遼金宋各自為史輟耕錄云朝廷

人充學正山長國學生會試不中者與終場舉人同夏四月丙申

朔日食兩都桑葉皆生黃色龍文河決白茅口六月壬子命經筵

官一月三進講安雅堂集云帝優禮講官既賜酒饌又以高秋七月戊寅立永昌

等處宣慰司庚辰太白犯右執法河南自四月至是霖雨不止八

月甲午朔命朶思麻宣慰司同知鎖兒哈等討四川上蓬瑣吃賊

九月甲子湖廣平章鞏卜班擒獠賊唐太二蔣仁五至京誅之其

黨蔣丙復號順天王攻陷連桂二州冬十月戊戌鐵木兒花罷

丁未月食己酉帝親祀上帝于南郊以太祖配右丞相脫脫及亞

獻官太尉阿魯圖為終獻官己未以郊祀禮成赦天下文官普減

一資武官升散秩一等蠲民間田租五分賜高年帛十二月丁未

命別兒怯不花為左丞相韓元善叅知政事膠州高密縣地震是歲罷民間食鹽徵清江處士杜本不至

四年甲申春正月辛巳定守令黜陟之法六事備者升一等四事

備者減一資三事備者平遷六事俱不備者降一等

六事者戶口增田野闢詞訟簡盜賊息賦役均及常平得法也按職官志止云五事不及常平庚寅河決曹州募夫萬五千人築之又決汴梁

閏二月乙亥月食三月丁酉復立武功縣癸丑以納麟平章政事

姚庸為中書左丞夏五月甲辰右丞相脫脫辭職命阿魯圖代之

封脫脫為鄭王黃河暴溢決金隄曹濮濟兗皆罹患北侵安山沿

入會通運河秋七月戊子朔溫州颶風大作海水溢地震益都鹽

徒郭火你赤作亂上太行由陵川入壺關至廣平殺兵馬指揮使

復還益都莒州蒙陰縣地震九月丁亥朔日食冬十一月丁亥朔

以各郡縣民饑禁抑配食鹽復令民入粟補官戊子禁內外官民

宴會不得用珠花十二月己未增置四川省推官及惠民藥局壬

戌太陰犯外屏漢陽東平地地震是歲太廟惟舉春秋二享五年亦

如之

五年乙酉春正月薊州地震以陳思謙參議中書省事夏四月丁

卯遣大都流民還鄉官給路糧募富戶出米五十石以上者旌以

義士號五月己丑放軍士所掠子女千一百人還雲南仍給行糧

丁未河間竈戶被水災權停餘鹽二萬引候年豐還官秋七月丁

亥河決濟陰丙午命鐵木兒塔識為御史大夫九月壬午朔日食

辛丑以搠思監為中書左丞朶兒直班呂思誠並參知政事冬十

月壬子以賀惟一為御史大夫賜名太平

元制臺端非國姓不授故特賜蒙古名本傳作六年事

遣使宣撫巡行天下詔曰朕自踐祚以來十有餘年托身億兆之

上端居九重之中耳目所及豈能周知故雖夙夜憂勤冀安黎庶

而和氣未臻災眚時作聲教未洽風俗未淳吏弊未祛民瘼滋甚
豈承宣糾劾奉行有所未至與若稽先朝成憲遣官分道宣撫其
詢民疾苦疎滌冤滯蠲除煩苛體察官吏賢否明加黜陟有罪者
四品以上停職申請五品以下就便裁決民間興利除害之事悉
聽便宜舉行命忽都不丁何執禮之兩浙江東道散散王士宏之
江西福建道拔實秦德從之江南湖廣道定僧魏景道之河南江
北道蠻子李獻之燕南山東道不花斬義之河東陝西道伯家奴
王也速迭兒之山北遼東道阿牙赤王紳之甘肅永昌道定定蘇
天爵之京畿道左答納失里賈惟貞之海北海南廣東道阿乞刺
杜德遠之雲南省答爾麻失里王守誠之四川省時諸道奉使者皆與臺
憲互相掩蔽惟京畿道
定定蘇天爵湖廣道
拔實糾舉無所避辛未宋遼金三史成帝謂羣臣曰史既成書前人善
惡朕當取爲法戒然豈止激勸爲君者爲臣者亦當知之卿等其

體朕心以前代善惡爲勉十一月甲午至正條格成頒示天下奉
元路陳望叔僞稱燕帖古思太子伏誅十二月丁巳詔定薦舉守
令法

六年丙戌

本末紀要云正月司天監奏天狗星墮地血食人間
五千日始于楚徧及齊趙終于吳其光不及兩廣

春二月庚戌朔日

食辛未山東地震七日乃止三月辛巳盜扼李開務開河劫商船

官軍不敢捕京畿山東盜並起夏四月丁卯萬戶買住討吾者野

人遇害詔恤其家命左右二司六部吏屬於午後講習經史五月

壬午罷江西田賦提舉司丁亥盜竊太廟神主丁酉立河南山東

行都水監專治決河六月己酉汀州連城縣民羅天麟陳積萬作

亂陷長汀縣丁巳雲南賊歿可伐作亂海志作
思可法侵奪路甸命亦禿渾

爲雲南平章討之秋七月丁亥散毛洞蠻軍全在叛招降之立散

毛誓匡軍民宣撫司癸巳選怯薛官爲路府縣達魯花赤丙申以

呂思誠爲中書左丞朶爾直班爲右丞答兒麻忒知政事九月乙酉克復長汀縣戊子邵武地震有聲如鼓至夜復鳴冬閏十月乙亥詔赦天下免差稅三分水旱之地全免靖州猺賊吳天保陷黔陽有衆六萬癸未汀州賊徒羅德用殺賊首羅天麟陳積萬以首級送官餘黨悉平十二月甲申復立大護國仁王寺昭應宮財用規運總管府凡貸民錢二十六萬餘錠甲午增北邊海海刺禿二處屯田後以沙土苦寒不久遂廢復立八百宣慰司以土官韓部襲其父爵尚書李綱請躬祀郊廟近正人遠邪佞以崇陽抑陰不聽是歲阿魯圖罷太廟惟舉夏秋二享

七年丁亥春正月甲辰朔日食大寒而風朝官多仆者壬子命別兒怯不花爲右丞相鐵木兒塔識爲左丞相蓋苗參知政事庚申雲南老丫等蠻來降寰宇記作老過立老丫耿東路軍民總管府丙寅汰宿

衛士止存累朝定額二月甲戌朔山東地震壞城郭棣州有聲如雷河南山東盜蔓延濟寧滕邳徐州等處庚辰以鎖南班爲中書右丞道童參知政事宦者伯帖木兒爲司徒猺賊吳天保寇沅州陷澈浦辰溪縣以阿吉刺知樞密院事三月乙巳修光天殿庚戌試國子監會食弟子員選補路府及各衛學正戊午敕編六條政類夏五月乙丑別兒怯不花以災異乞罷詔以太保就第臨淄縣地震七日乃止免太師馬札兒台官放之西寧州其子脫脫欲與父俱行帝從其請以太平平章政事秋七月甲寅召隱士完者圖執禮哈琅爲翰林待制張樞董立爲修撰李孝光爲著作郎樞不至丙辰太陰犯壘壁陣丁巳以納麟爲御史大夫九月癸卯八隣內哈刺那海禿魯和伯賊起斷嶺北驛道癸丑上都早霜殺禾甲寅詔舉材能學業之人以備侍衛辛酉鐵木兒塔識卒命國王朶

兒只為左丞相丁卯吳天保陷武岡延及寶慶殺行省右丞沙班
冬十月丁丑詔左右丞相平章樞密知院御史大夫得賜玉押字
印餘官不與辛卯開東華射圃戊戌西番盜起凡二百餘所陷哈
刺火州劫供御葡萄酒殺使臣十一月甲辰沿江盜起兩淮鹽運
使宋文瓚上言世皇開會通河千有餘里歲運米至京者五百萬
石曩者騎賊不過四十人扼李開務劫船三百艘有司莫能捕至
江陰通泰為江海門戶鎮江真州次之國初設萬戶府鎮其地今
戍將非人致使賊艦往來無常集慶花山賊僅三十六人官軍數
萬不能進討反為所敗後竟假手鹽徒雖能成功豈不貽笑宜亟
選智勇以圖後功不然東南五省租賦之地恐非國家所有不報
輟耕錄云花山賊軍四等僅三十六人內一婦人九勇旋殺傷官軍無數
縱橫茅山三月餘三省撥兵不能捕後募羅從朱陳等率其黨一鼓擒之撥山東地十六
萬二千餘頃給大承天護聖寺為永業庚戌太陰犯天廩甲寅吳

天保陷靖州命威順王寬徹普化鎮南王孛羅不花將兵討之已

未以韓嘉訥為中書平章政事紀稱是月以嘉訥為陝西行臺大夫而通鑑則稱以嘉訥為平章按宰相年表至正七八九年皆載嘉訥

名故改丁卯海北湖南徭賊竊發有司不以聞詔降散官一等馬札

兒台卒于甘肅召脫脫還十二月庚午命朵兒只為右丞相太平

拜左丞相丙子帝以連年水旱民多失業特選臺閣名臣二十六

人出為守令許民間利害實封呈省丙戌以河南盜賊充斥分撥

達達軍與揚州舊軍赴沿河關隘戍守是歲置中書議事平章四

人太廟不舉秋享

八年戊子春正月戊戌朔以也先帖木兒知樞密院事辛亥黃河

決遷濟寧路于濟州命湖廣右丞禿赤都元帥完者帖木兒討莫

磐洞諸蠻縛其洞首楊鹿五赴京師二月乙亥復立孛答乃禿忙

兀三處屯田隸虎賁司庚辰太陰犯軒轅癸未犯平道壬辰以前

奉使宣撫廣東道賈惟貞稱職特授永平路總管立行都水監于
鄆城以賈魯爲太監三月丁酉詔頒金帛旌守令之廉勤者壬寅
土番盜起有司請不拘資級委官討之福建盜起分立汀漳二元
帥府鎮之丙辰太陰犯建星己未遣使銓閩廣蠻彝等官選辛酉
遼陽鎖火奴及兀顏撥魯歡詐稱大金子孫作亂官軍討斬之夏
四月乙亥帝視國子學升衍聖公秩從二品定弟子員出身及奔
喪省親等制詔守令選立社長專一勸課農桑京官三品以上歲
舉守令一人守令到任三月亦舉一人自代其玉典赤拱衛百戶
不得任縣達魯花赤止授佐貳官平江松江大水留海運糧十萬
石賑之五月丁酉朔大霖雨京城崩庚子廣西灘江溢四川旱饑
禁酒六月丙寅朔升徐州爲府以邳宿滕嶧四州隸之丙戌立司
天臺于上都秋七月丙申朔日食壬子量移竄徙官於近地安置

成者聽歸葬江州總管劉恒有政績超升山東宣慰使八月丙子
太陰犯壘壁陣九月己未太陰犯靈臺冬十一月辛亥吳天保掠
全州以太不花忽都不花並平章政事台州黃巖民方國珍作亂
聚衆海上命江浙參政朶兒只班討之是歲太廟闕冬祭

九年己丑春正月庚戌太白犯建星辛亥犯平道命太不花提調

會同館三月丁酉壩河淺澁調軍民各萬人濬之己亥太白犯壘

壁陣夏四月丁丑以欽察台平章政事韓元善爲中書左丞壬午

以河間水災佳煎鹽三萬引

玉堂鑑綱云資陽軍子生甫周歲暴長四尺許容貌異常備腹嘻笑如俗所畫布袋和尚者

五月

戊戌加脫脫太傅提調內史府庚子修黃河金堤民夫日給鈔三

貫庚戌命翰林國史院等官薦舉守令丙辰定守令督攝之法路

督攝府府督攝州州督攝縣是月白茅河東注沛縣成巨浸蜀江

溢灌漢陽城民大饑詔刻小玉印其文曰至正珍秘凡秘書監所

掌書畫皆識之秋七月庚寅監察御史幹勒海壽劾殿中侍御史哈麻及其弟雪雪交結脫忽思皇后宮闈脫忽思帝庶母御史大夫韓嘉訥以聞不省章三上詔奪哈麻雪雪官居之草地出海壽為陝西副使左遷嘉訥為江浙平章壬辰命皇子愛猷識理達臘習學漢文以李好文為諭德歸賜為贊善張冲為文學甲午以也先帖木兒復為御史大夫亦憐真班知樞密院事提調武備寺丙午太陰犯壘壁陣癸丑犯天關乙卯丞相朶兒只太平俱罷復命脫脫為右丞相朶思監為右丞玉樞虎兒吐華參知政事戊午命岐王阿剌乞鎮西番九月甲子敕建言中外利病者委官選其可行之事以聞丙戌熒惑犯靈臺冬十月丁酉命皇子八端本堂肄業丞相脫脫領端本堂事司徒雅普化知端本堂事皇子與師傅分東西向坐授書其下僚屬以次列坐王忠文公集云至正九年冬詔以皇子春秋日長宜親師傅授書其下僚屬以次列坐

士直學士待制兼其職復置正字司經各二員即典聖宮西偏故宣文閣改曰端本堂為肄學之所十月九日皇子始就學其堂虛中座以俟至尊臨幸皇子坐于皇帝位之右而左向其左設師傅之位諭德以下以次列坐而右向比授經則別設授讀位

太陰犯畢庚辰太白犯壘壁陣十二月戊戌太白復犯壘壁陣丁未吳天保陷辰州皇后脫忽思以幹勒海壽之言侵已泣訴于帝帝怒奪海壽官并誣韓嘉訥賊罪杖流奴兒干死是歲詔汰冗官均俸祿賜致仕官及高年帛太廟不舉秋享

十年庚寅春正月丙辰朔以朶思監平章政事玉樞虎兒吐華為中書右丞壬戌立四川容美洞軍民總管府壬申太陰犯熒惑甲戌隕石棣州色黑中帶金星先有聲自西北來至州北二十里乃隕二月丙戌加封天妃父種德積慶侯母育聖顯慶夫人辛丑太陰犯平道甲辰犯鍵閉三月己卯熒惑犯太微垣奉化州山石裂有禽鳥草木山川人物之形夏四月丁酉詔赦天下略曰朕纂承

洪業撫臨萬邦夙夜勵精靡遑暇逸比緣倚注失當治理乖方是
 用圖任一相俾贊萬幾爰命脫脫為右丞相統正百官允釐庶績
 曾未期月百度具舉中外協望朕甚嘉焉尚慮軍國之重民物之
 繁政令有未孚生意有未遂可大赦天下丙午太白犯鬼六月壬
 子有星大如月入北斗震聲若雷三日復還秋七月辛酉太陰犯
 房辛未太白晝見丁丑復見九月癸丑朔太白晝見辛酉祭京師
 三皇廟先是歲祀以醫官行禮江西廉訪使文殊訥言禮有未備乃赦
 工部具祭器江浙造雅樂太常定儀式翰林撰樂章至是用之壬戌熒惑犯天
 江壬午以吏部條格繁多銓選者得意為高下命編類成書冬十
 月癸巳歲星犯軒轅丙申太陰犯昴犬名東平濟南徐州各立兵
 馬指揮司俾捕馬賊十一月壬子朔日食罷遼陽濱海民煎野鹽
 戊辰太陰犯鬼己巳從尚書僕哲篤都事武祺言更定鈔法詔曰
 爰自世祖頒行中統交鈔以錢為文厥後造至元寶鈔以一當五

名曰子母相權而錢實未用歷歲滋久鈔法偏虛物價騰踊民用

匱乏其以中統交鈔一貫文省權銅錢一千文准至元寶鈔二貫

仍鑄至正通寶錢與歷代銅錢並用以實鈔法可頒示天下所義補
云交鈔

之法起于金按元制銀五十兩易鈔千兩是銀一兩直錢二十
兩也中統元寶鈔兩貫同白銀一兩其所直錢亦與交鈔同是月三星隕于耀州化

為石如斧形削之有屑擊之有聲十二月壬午朔以大司農禿魯

等兼領都水監集河防正官議黃河便益事乙未太陰犯鬼己酉

方國珍寇溫州命江浙左丞李羅帖木兒討之京師麗正門樓上

忽有人妄言災禍鞠之自稱薊州人已而不知所往是冬溫燠草

木皆萌芽吐花大雪而雷電是歲太廟四祭皆不舉

十一年辛卯春正月丙辰辰星犯牛丁卯蘭陽縣有紅星大如斗

自東南墜西北其聲如雷立湖南分元帥府于寶慶路山東分元

帥府于登州二月庚寅太陰犯鬼乙未犯太微丁酉犯亢三月丁

卯太陰犯東咸戊辰犯天江徵建寧處士彭炳為端本堂說書不
 至夏四月壬午詔開黃河故道命賈魯以工部尚書充總治河防
 使發汴梁大名十三路民十五萬廬州等戍十八翼軍二萬供役
 仍命右丞王樞虎兒吐華同知樞密院事黑廝以兵鎮之冀寧孟
 州地震半月乃止乙酉加封河瀆神為靈源神祐宏濟王重建河
 瀆及西海神廟丁酉立鎮寧州辛丑師壁洞土官田驢什用盤順
 府土官墨奴什用降立長官司四五月己酉朔日食辛亥潁州妖
 人劉福通作亂以紅巾為號陷本州其黨韓山童就擒山童子韓
 林兒逃之武安軍六月劉福通據朱臯攻破羅山真陽確山上蔡
 遂犯舞陽葉縣李羅帖木兒討方國珍兵敗被執轍耕錄云至正辛卯夏
 帝開化嘉興陶氏磨上木肘發膏條開白花吳江分湖里蝦工一
 柳樹椿以安鐵碓者發長條數莖如草三家雖有此怪而皆無恙秋七月丁巳罷四川
 大奴管勾洞長官司改立忠孝軍民府己未太陰犯斗壬戌犯右

執法已巳太白犯左執法熒惑入鬼命大司農達識帖睦爾等招
 諭方國珍國珍偽降八月丁丑朔中興地震乙酉太陰犯天江丙
 戌蕭縣李二號芝羅田徐壽輝本名貞寇起二陷徐州壽輝陷蘄州
 亦以紅巾為號九月壬子命御史大夫也先帖木兒知樞密院事
 將諸衛軍十餘萬討河南妖寇乙卯辰星犯左執法丁巳太白犯
 房戌辰太陰犯鬼劉福通陷汝寧府及息光二州徐壽輝陷蘄水
 縣及黃州路冬十月戊寅熒惑犯太微垣辛巳太陰犯斗癸未立
 寶泉提舉司于各省鼓鑄至正通寶錢印造交鈔令民間通用之行
未久物價騰踊至逾十倍民皆以貨物相貿易
 既而海內兵起京師給鈔于錠易斗粟不可得乙酉太白犯斗己丑太白晝見熒
 惑犯歲星辛卯太白犯斗癸巳歲星犯右執法丙午熒惑犯左執
 法是月饒州建寧兩黑子大如菽信衢二州及邵武路兩叅民多
 取食之徐壽輝據蘄水為都國號天完僭稱帝改元治平十一月

癸丑有星孛于婁甲寅見于胃丁巳微見于畢太陰犯填星黃河堤成河復故道遣使告祭河伯名賈魯還超授集賢大學士命翰林承旨歐陽元製河平碑十二月丙子朔太白晝見丁丑太白經天已卯立河防提舉司隸行都水監庚辰太白犯壘壁陣甲申太陰犯填星丙戌以烏古孫良楨參知政事辛卯太白經天丁酉太白晝見太陰犯熒惑庚子太白經天辰星犯天江辛丑也先帖木兒復上蔡縣擒劉福通偽將韓咬兒等送大都誅之壬寅太白晝見是年太廟闕秋享

十二年壬辰春正月戊申竹山縣賊陷襄陽總管柴肅歿之是日荆門州亦陷庚戌以月魯不花平章政事壬子諭河南湖廣調兵討賊正當首春耕作之時恐農民不安田畝守令有失勸課宜委通曉農事官分道巡視督勒有司親詣鄉都省諭農民依時播種

務使人盡其力地盡其利其有曾經盜賊水患供億繁重貧民不能自備牛種者所在官為量給仍飭領兵官嚴禁屯駐軍馬毋得踐踏以致農事廢弛丙辰徐壽輝遣將丁普郎徐明遠陷漢陽及興國府己未徐壽輝偽太師鄒普勝陷武昌辛酉徐壽輝遣將魯法興陷安陸知府丑驢歿之癸亥添設刑部尚書侍郎各一員乙丑太陰犯熒惑己巳歲星犯右執法壬申中興路陷拘刷大都河南陝西遼陽漢人馬二月乙亥朔以賈魯為中書添設左丞命諸王禿堅守揚州孛蘭奚守太名寧王牙安沙鎮四川乙酉徐壽輝兵陷江州總管李黼歿之遂陷南康及岳州庚寅太陰犯太微垣癸巳犯氏辛丑置安東安豐分元帥府鄧州賊王權張椿陷灋州龍鎮衛指揮使掩都刺哈蠻帥師復之是月賊侵滑濬諸邑起德住為河南右丞守東明賊不敢犯時德住致仕于家聞命即出徐壽輝偽將歐祥陷

袁州命帖里帖木兒以中書參政分省濟寧定遠人郭子興起兵
自稱元帥與其黨孫德崖等破濠州三月乙巳朔徐壽輝偽將許

甲攻衡州陶九陷瑞州壬子以太不花為河南省平章史作左丞克

復南陽等處癸丑重行納粟補官有能自備糧米供給軍儲者照依定擬地方實

等官能再輸糧供軍者戊午太陰犯進賢壬戌犯東咸甲子徐壽輝遣將

項普略陷饒州路遂陷徽信二州丁卯出幣帛各十萬疋於迤北

萬戶千戶所易馬戊辰太白晝見詔省院臺官依世祖舊制兼用

南人有才學者立饒州德興銅冶場時有張理獻言膽水浸鐵可成詔隨朝

諸正官各舉循良材幹智勇兼全堪充守令者二人多者不限員

數試用守令並兼管義兵防禦諸軍奧魯勸農事任滿稱職者許

實授凡除常選官於殘破郡縣及逼近賊境者升四等稍近者升

一等方國珍復劫其黨八海台州路達魯花赤泰不華與戰于澄

江歛之隴西地震百餘日城郭頽圮陵谷變遷定西會州靜寧莊

浪尤甚會州公解牆崩獲弩五百餘張長丈餘人莫能挽改定西

為安定州會州為會寧州輟耕錄云至正壬辰春二月杭州一州黑氣巨天雷電中

似松子仁皆曰娑婆樹子閏月十二日復雨八初閏月壬午以答失拔都魯為四

川添設參政與本省平章咬住同討山南湖廣賊乙酉徐壽輝偽

將陳普文陷吉安路鄉民羅明遠起義兵復之壬辰遣官詣上都

分給出征河南達達軍口糧立淮南江北行省治揚州兼轄高郵

淮安滁和廬州安豐安慶蘄州黃州丁酉湖南參政鐵傑復岳州

四川平章咬住克取忠萬夔雲陽等州戊戌以晃火兒不花平章

政事蠻子為中書右丞秦從德為左丞答失禿趙璉並參知政事

悟良哈台杜秉彝為添設參知政事命江西左丞相亦憐真班守

江東關隘諸王亦憐真班愛因班參政也先帖木兒與陝西平章

元身卷之...
月魯帖木兒討南陽襄陽賊刑部尚書阿魯討海寧賊江西右丞
火尼赤與參政朶解討江西賊浙東宣慰使恩寧普守蕪湖江西
右丞兀忽失江浙左丞星吉不顏帖木兒蠻子海牙同討饒信賊
方國珍不受撫命江浙左丞左答納失里討之知樞密事也先帖
木兒駐軍沙河軍中夜驚軍潰退屯朱仙鎮命中書右丞蠻子代
總其軍名也先帖木兒還仍爲御史大夫西臺御史范文等十二
人劾其喪師辱國不聽夏四月癸卯朔日食江西臨川賊鄧忠陷
建昌路甲寅以搠思監渾都海牙並平章政事提調留守司丙辰
江西宜黃賊塗佑與建寧賊應必達攻陷邵武路千戶魏淳以計
擒之復其城辛酉四川參政桑哥失里復渠州荆門知州聶炳復
荆門州四川平章咬住復歸州近攻峽州詔天下完城郭築堤防
命亦都護月魯帖木兒領畏吾兒軍同豫王阿刺忒納失里知樞

密事老章同討襄鄧賊左遷西臺御史大夫朶爾直班爲湖廣平
章范文等十二人爲各路添設佐貳官五月癸酉朔太白犯填星
已卯咬住復中興路庚辰徙瀛國公之子和尚趙完普及親屬于
沙州禁勿與人通罷朶兒棚等場金銀課停海漕夏運癸未建昌
民戴良起鄉兵克復本路乙酉命留守帖木哥與諸王朶兒只守
口北龍慶州答失拔都魯至荆門募兵趨襄陽與賊戰大克之六
月辛亥太白犯井丙寅紅巾賊周伯顏陷道州秋七月庚辰徐壽
輝黨項普畧由饒徽犯昱嶺關陷杭州路江浙參政樊執敬戰歿
濟寧路總管董搏霄率兵復之遂克徽州己丑湘鄉賊陷寶慶路
庚寅丞相脫脫請親出師討徐州帝許之六部尚書合疏乞留不
聽丁酉辰星犯靈臺湖南副元帥小云失海牙總管兀顏思忠復
寶慶路徐壽輝僞將王善等陷福安寧德等縣八月甲辰復以哈

麻爲中書添設右丞丁卯詔脫脫以太傅右丞相督制諸軍省院
 臺分官屬從行稟受節制即日發京師是夜太白犯歲星安陸賊
 將俞君正復陷荆門州知州聶炳成之賊將党仲達復陷岳州九
 月乙亥俞君正復陷中興咬住與戰于樓臺敗績奔松滋本路判
 官上都成之癸未中興義士范忠偕荆門僧李智率義兵復中興
 路降咬住爲淮西元帥司饋餉辛卯脫脫復徐州屠其城李二遁
 走壬辰太陰犯軒轅庚子詔加脫脫太師趣班師還朝冬十月戊
 午太陰犯鬼甲子犯歲星乙丑犯亢大方通鑑云霍山崩前三日山
 如雷鳴禽獸散阻石數里十一月
 辛未命江浙平章慶童收捕常州賊乙亥以星吉爲江西平章擊
 趙普勝于湖口兵敗成之丙子遣南臺侍御史左答納失里江浙
 右丞帖理帖木兒總兵討方國珍癸未脫脫請興近畿水利召南
 人耕種歲可得粟麥百萬石不煩海運京師足食帝曰此事有利

于國其速行之庚寅太陰犯太微垣十二月辛亥詔杭常湖信廣
 德諸路皆新復赦註誤者蠲其租命有司加意撫恤是歲海運不
 通京師闕食潁州沈邱人察罕帖木兒與羅山李思齊同起義兵
 破賊有功授察罕汝寧府達魯花赤思齊爲知府李二餘黨趙均
 用人濠州據之僭稱王

十三年癸巳春正月庚午朔用帝師請釋在京罪囚辛未立分司
 農司以悟良哈台爲右丞烏古孫良楨爲左丞兼大司農卿給分
 司農司印西自西山南至保定河間北抵檀順州東及遷民鎮凡
 係官地及元管屯田悉從分司農司召募農夫立法佃種給鈔五
 百萬錠供其費丙子方國珍僞降庚辰募江淮善種水田修築圍
 堰者各千人爲農師降空名告身十二道遣使賫往募農民百人
 者授九品二百人者授八品三百人者授從七品卽填流官職名

與之令領所募人至田所期年散歸人給鈔十錠乙酉太陰犯太
微垣丙戌答失拔都魯克復襄陽樊城庚寅老章克復南陽唐州
戊戌熒惑太白辰宿聚于奎二月己酉太陰犯軒轅庚戌太白犯
熒惑壬子太陰犯太微垣甲寅立脫脫平徐勳德碑命領大司農
司提調太史院司天監夏四月辛丑太白犯井辛亥太陰犯房降
徐州路爲武安州改所轄縣屬歸德府其滕州嶧州仍屬益都路
五月辛未江西左丞相亦憐真班師由信州元帥韓邦彥由徽州
浮梁同取饒州斬黃賊奔潰乙亥太陰犯歲星乙未泰州白駒場
亭民張士誠及其弟士德士信作亂陷泰州及興化縣高郵知府
李齊不屈歿士誠自稱誠王僭號周建元天祐六月丙申朔立皇
子愛猷識理達臘爲皇太子復置詹事院以丞相脫脫兼領俾得
銓注官屬庚子命知樞密院事失刺拔都魯總河南軍平章答失

拔都魯總四川軍自襄陽分道而下克復安陸府癸卯詔平章達
識帖睦迺總領漢軍蒙古守禦淮南遼東吾者野人撈羊哈及乾
帖困朮赤朮等五十六人以皮貨來貢給銀牌一百令管吾者野
人秋七月丁卯泉州天雨白絲海潮日三至戊辰太白晝見命宦
官至一二品者依常例給俸壬申湖廣參政阿魯輝復武昌及漢
陽府資政院使脫火赤復江州路九月乙丑朔日食庚寅太陰犯
熒惑壬辰太白經天熒惑犯左執法

分三洞洞上結絲爲飛樓樓上置女樂橋以木爲質飾以錦繡九洞不相直達

冬十月甲辰歲星犯氏丁未廣西元帥

掖庭記云帝起采芳館于瓊華島內癸巳秋采龍船泛月池上池起浮橋三處每處

甄崇福復道州庚戌從帖理帖木兒左答納失里請授方國珍徽
州路治中國璋廣德路治中國瑛信州路治中國珍疑懼不受命
立水軍都萬戶府于崑山州以納麟哈刺爲正萬戶董搏霄爲副
萬戶癸亥太白犯亢是月徹世祖所立瓊帳改建殿宇十一月壬

申太陰犯壘壁陣丁亥江西右丞火尼赤以兵平富州臨江遂復
瑞州立義兵千口水軍千戶所于江西十二月丁酉太白犯東咸
庚子熒惑入氏庚戌京城無雲而雷少頃有火見于東南懷慶路
及河南府西北有聲如擊鼓者數四已而雷聲震地丁巳太陰犯
心江浙平章卜顏帖木兒等會兵討徐壽輝于蘄水敗走之獲偽
官四百餘人陝西四川行省合兵復均房等州是歲起清寧殿前
山子月宮諸工役重建穆清閣帝行西僧秘密運氣術號演揲兒
法又以宮女十六人作天魔舞遇宮中讚佛則按舞奏樂官官非
受秘密戒者不得預是冬闕享太廟

十四年甲午春正月甲子朔汴河水文成五色花草如繪畫三日
方解之乙丑熒惑犯歲星丁卯太白犯建星癸酉熒惑犯房立遼
陽漕運庸田司屬分司農司丙戌答失拔都魯復峽州二月戊午

太白犯壘壁陣遣吏部侍郎貢師泰和糴于浙西得糧百萬石立
鎮江水軍萬戶府河南淮南並立義兵萬戶府有功者權授軍職
事平改民官建清河大壽元忠國寺括江浙廢寺田歸之三月癸
亥朔日食詔北邊有馬之家十取其二每馬給鈔十錠夏四月癸
巳朔介休縣地震泉湧以武祺參議中書省事方國珍復擁船據
海道阻絕糧運遣江浙右丞阿兒溫沙參政恩寧普總兵討之復
立應昌全寧二路先有旨撥屬營王土備府有司以為不使故仍立之造過街塔于蘆溝橋修白浮
瓮山隄五月甲子修北巡所經色澤嶺黑石頭河西沿山道路立
南陽鄧州等處毛胡蘆義兵萬戶府募土人為軍免其差役令討
白劾因其鄉人自相團結各佩毛胡蘆藏兵器為號因以名之命四川平章玉樞虎兒吐華募兵萬人下
蜀江守荆門答失拔都魯提兵赴汝寧六月辛卯朔張士誠寇揚
州達識帖睦迺以兵討之敗績士誠陷盱眙泗州甲辰太陰犯斗

秋七月甲子襄垣縣大風拔木偃禾乙丑太陰犯角壬午犯昴孝
義縣地震郭子興自稱滁陽王九月己未朔復以呂思誠爲中書
左丞月闕察兒平章政事命丞相脫脫總制諸王各翼軍馬出征
高郵甲子方國珍拘浙東元帥也忒迷失知州趙宜浩以俟命冬
十月戊戌詔答失拔都魯及太不花會軍討安豐賊壬子太陰犯
太微垣十一月丙寅敕省院臺凡奏事先啟皇太子丁卯脫脫統
大軍至高郵與張士誠連戰皆捷分兵六合縣賊勢大蹙丙子
太陰犯鬼答失拔都魯復苗軍所據鄭均許三州十二月辛卯命
定住爲左丞相哈麻鎖南班並平章政事監察御史袁賽因不花
等劾脫脫及其弟也先帖木兒前後出師畧無寸效章三上帝令
也先帖木兒出國門聽旨以汪家奴代爲御史大夫丁酉詔以脫
脫老師費財坐視寇盜恬不爲意削去官爵安置淮安路也先帖

木兒庸懦無能安置寧夏路以太不花爲河南左丞相月濶察兒
爲太尉雪雪知樞密院事代領其軍免大都上都興和三路稅糧
一年被災殘破地方並蠲租三年罷庸田茶運寶泉等司戊戌以
桑哥失里爲中書添設左丞己亥太陰掩昴己酉紹興路地震答
失拔都魯復河陰鞏縣獠賊寇衡州萬戶許脫因歿之是歲詔民
間私租太重以十分爲率普減二分著爲例帝自製龍舟於內苑
又自製宮漏精巧皆絕出人意

龍舟長百二十尺廣二十尺前五簾棚穿廊兩暖閣後五殿樓子龍身并殿宇俱五彩金飾用水工二十四人身衣紫衫金荔枝帶自後宮至前宮山下海子內往來游戲行時龍首尾眼爪皆動宮漏高六七尺廣半之造木爲圓藏其中運水上下噴上設西方三聖殿腰立玉女捧時刻籌時至輒浮水而上左右列一金甲神一懸鐘一懸鈺夜則神人自按更而擊無分毫爽當鐘鈺鳴時獅鳳在側者皆自翔舞墮之東西有日月宮飛僊六人立宮前過子午時飛僊自能欄進度僊橋達三聖殿已復退立如前

十五年乙未春正月戊辰太陰犯五車辛未犯鬼丁丑徐壽輝僞
將倪文俊復陷沔陽府遣部將明玉珍守之玉珍遂據重慶庚辰

復設仁虞雲需尚供三總管府閏月壬寅摘各衛軍屯田京畿人
給鈔五錠丙午太陰犯心丙辰太白經天二月己未劉福通迎立
韓林兒為帝又號小建都亳州僭號宋改元龍鳳戊辰命汪家奴為
右丞相定住為左丞相壬申立淮東宣慰司都元帥府于天長縣
統濠泗義兵萬戶府聽富民願出丁壯五千名者為萬戶五百名
者為千戶百名者為百戶是月郭子興卒三月庚寅太陰犯五車
甲午授皇太子玉冊賜冕服九旒祇謁太廟丙申太陰犯房辛丑
改竄脫脫于雲南鎮西路也先帖木兒于四川礪門并籍其家癸
丑太白經天輟耕錄云至正乙未春遣兵部員外郎劉謙來江南募民補路府州司縣官自
五品至九品入粟有差非舊例之職專茶鹽務場者比松江知府崔思誠曲承
使命拘集屬縣巨室點利十二名抑使承伏
卽填空名告身授之他處竟無一人應者夏四月癸酉命定住為右丞相哈
麻為左丞相桑哥失里平章政事雪雪為御史太表丁丑立宣化
鎮南軍民府于四川升四川羊母甲洞臭南王洞長官司為忠義

軍民安撫司五月壬辰監察御史也里忽都劾河南左丞相太不
花慢功虐民詔削職命答失拔都魯為河南行省平章代之駐軍
陳留庚戌倪文俊自沔陽陷中興路元帥朶兒只班歿之六月癸
亥太白經天丁丑保德州地震庚辰徵徽州隱士鄭玉為翰林待
制不至是月濠州朱元璋即明太祖起兵和陽渡江取太平路秋七月
壬寅倪文俊復陷武昌漢陽進攻岳州命親王失里門四川左丞
沙刺班等分守山東湖廣四川諸路及招諭各起兵者輟耕錄云至正
乙未秋七月三
日橋李東馬橋上白龍挂百風怪雨天闇若深夜壞民居五百餘所大水盡拔木自空墜下悉折
為一雜以萬瓦亂飛溪水直立人皆叫號奔走不暇龍由城北望太湖去不一年其地為戰鬪之
所八月戊辰以達識帖睦爾為江浙左丞相戊寅太白經天雲南
歿可伐降立平緬宣撫司四川向思勝降改安定州為軍民安撫
司起前左丞相太平為淮南行省左丞相總制山東軍駐濟寧立
吾者野人乞列迷等處諸軍萬戶府于哈兒分之地斬黃賊陷宣

州禮部尚書致仕汪澤民歿之九月癸未以紐的該平章政事幹
變爲中書左丞丁好禮參議省事己丑太白犯太微垣己亥倪文
俊圍岳州改竄脫脫于阿輕乞之地冬十月丁巳立淮南行樞密
院于揚州己未太陰犯壘壁陣帝謂右丞相定住曰敬天地尊祖
宗重事也朕將親祀郊廟務盡誠敬卿等共議典禮從其簡者行
之庚午以襲封衍聖公孔克堅同知太常禮儀院事其子希學襲
封衍聖公癸酉太陰犯軒轅定郊祀禮以太祖皇帝配上出宮至
郊所便服乘馬不設內外儀仗教坊隊子齋戒七日內散齋四日
於別殿致齋三日二日在大明殿西幄殿一日在郊所丙子立海
道防禦運糧萬戶府于平江黃河水軍萬戶府于小清口十一月
甲申熒惑犯氏庚寅填星犯井壬辰親祀上帝于南郊特命太子
爲亞獻丞相定住爲終獻通考云帝每歲致祭社稷自正十五年後廢不舉甲午復起太不花爲

湖廣左丞相荆襄諸軍悉聽節制給還元奪宣命己亥介休縣桃
杏花太陰犯鬼庚戌賊陷懷慶饒州二路十二月壬子朔熒惑犯
房丁巳命中書參政月倫失不花陳敬伯分省彰德癸亥立忠義
忠勤萬戶府于宿州武安州乙亥帝以天下兵起下詔罪己大赦
答失拔都魯大敗劉福通于太康遂圍亳州僞宋主韓林兒遁走
安豐立大兵農司于保定河間武清景薊四處招集夫丁且耕且
守又設兵農千戶所二十四百戶所四十八鎮撫司四隸之察罕
帖木兒與賊戰于河南北屢有功除中書刑部侍郎哈麻矯殺右
丞相脫脫是年太廟惟舉春秋二享綱鑑大全云湖廣兩黑雪陝西有一山西飛十五里其山之舊基積爲深潭
十六丙申春正月己丑太陰犯昴庚戌哈麻欲立太子爲帝奉
帝爲太上皇語泄與其弟雪雪並罷以搠思監爲御史大夫薊州
兩血地震倪文俊建僞都于漢陽迎徐壽輝據之二月丙辰搠思

監劾哈麻兄弟罪惡帝欲貸之丞相定住執奏不已詔貶哈麻惠
州雪雪肇州比行皆杖死丙寅命翰林國史院太常禮儀院定擬
二皇后奇氏三代功臣諡號王爵甲戌詔部院正官各舉材堪守
令者一人不拘蒙古色目漢人南人聽中書省酌用己卯遣集賢
直學士楊俊民致祭曲阜孔子廟張士誠據平江遂陷湖州松江
常州諸路集賢待制孫撝死之時搆持詔至平江招諭遂遇害三月辛巳徐壽輝寇襄
陽戊子命宣讓王帖木兒不花威順王寬徹普化以兵鎮懷慶路
朱元璋兵取集慶路南臺御史大夫福壽死之名山藏云平章阿魯灰參政百家奴集慶路達魯花赤達尼達思皆戰死丙申倪文俊陷灃州常德路丁酉立行樞密院于杭州命
達識帖睦爾兼知行院事省院官並聽調遣朱元璋兵取鎮江戊
申方國珍復降授為海道漕運萬戶國璋為衢州路總管是月有
兩日相盪夏四月辛亥命搠思監為左丞相普化為御史大夫丁

卯以知樞密事實理門分院濟寧五月壬辰太白犯鬼甲午太陰
入斗丁酉犯壘壁陣六月甲寅加苗軍帥楊完者為江浙參政以
其兵禦張士誠守嘉興乙丑朱元璋兵取廣德路續綱目云彰德李實如黃瓜童語曰李生黃瓜
民皆無家秋七月己卯朔朱元璋自稱吳國公改集慶路曰應天府建
官屬丁酉太陰犯壘壁陣張士誠遣兵陷杭州江浙平章左答納
失里戰死丞相達識帖睦爾遁入富陽苗帥楊完者及萬戶普賢
奴擊敗之復其城八月丙辰奉元路判官王淵以義兵復商州升
淵同知宣慰司事丁卯太陰犯昴庚午倪文俊陷衡州路元帥甄
崇福戰死甲戌彗星見張宿色青白彗指西南長尺餘至十二月
戊午朔始滅是月黃河決山東大水九月庚辰汝潁賊李武崔德
破潼關參政述律杰戰死壬午豫王阿剌忒納失里同知樞密事
定住引兵復潼關河南平章伯家奴以兵守之戊戌賊陷陝虢二

州命太尉納麟復為南臺御史大夫遷行臺治紹興輟耕錄云集慶失守行臺移置紹興

前御史大夫納麟再任又以其子安安判行樞密院時慶元慈溪則有縣尹陳文昭餘姚則有同知禿堅在城則有錄事司達魯花赤邁里古思皆總制團結民義者安安以三人為不易制乃給禿堅至拘留寶林寺夜率臺軍擒殺之從而方國珍亦執文昭沈之海獨存邁里古思一人及拜任哥代納麟為大夫又不能容擲殺于其私第察罕帖木兒復陝

號二州襲敗賊兵于平陸以功授僉河南行樞密院事冬十月丁

未大名路有星如火從東南流芒星如曳篲掩地有聲炎燄蓬勃

久之化為石青黑光瑩形如狗頭其斷處若新割者命藏于庫壬

申太陰犯井淮安城陷淮東道廉訪使褚不華歿之十一月丙戌

以老的沙答里麻失並為詹事丁亥流星大如酒杯色青白尾跡

長五尺餘光明燭地起自東北東南行沒于近濁有聲如雷壬辰

太陰犯井倪文俊陷岳州路殺威順王子解帖木兒湖廣參政也

先帖木兒與左江義兵萬戶鄧祖勝合兵復衡州西臺御史李尚

綱上關中形勝急論十二事命大司農司屯種雄霸二州以給京

師號京糧是年太廟惟舉春享

十七年丁酉春正月丙子朔日食辛卯命山東分省團結義兵仍

令各路達魯花赤提調聽宣慰使節制二月壬子李武崔德犯七

盤藍田命察罕帖木兒守潼關調河南兵聽豫王阿剌忒納失里

及定住同進討之癸丑太陰犯五車戊辰知樞密事脫脫復邳州

調客省使撒兒答溫等攻黃河南岸賊大破之壬申劉福通遣其

黨毛貴陷膠州僉樞密院事脫歡歿之甲戌倪文俊陷峽州李武

崔德陷商州三輔震恐察罕帖木兒與李思齊以兵自陝虢來援

殺獲無算論功以察罕為陝西左丞思齊為四川左丞加答失拔

都魯太尉四川左丞相三月乙亥應作朔義兵萬戶賽甫丁阿迷里

丁叛據泉州庚辰毛貴陷萊州宣慰副使釋嘉訥歿之壬午朱元

璋兵敗寧國路甲申太陰犯鬼壬辰歲星犯壘壁陣甲午毛貴陷

益都益王買奴遁自是山東郡邑皆陷丁酉毛貴陷賓州及莒州

戊戌以悟良哈台斡欒平章政事輟耕錄云至正丁酉春上海李勝一家雞伏七

明家一雞伏九雞一雞有三足二足在前一足在後諸醫家彥誠家一雞伏五雞一雞夏五月

戊寅平章赤老溫帖木兒復武安州等三十餘城丙申命撈思監

為右丞相太平復為左丞相詔免天下今歲稅糧之半六月甲辰

朔以帖里帖木兒老的沙並為御史大夫罷陝西行樞密院庚申

朱元璋兵取江陰州及徽州路癸酉有龍鬪于樂清江颶風大作

所至火光如毬灰者萬餘人是月劉福通犯汴梁其黨分三道關

先生破頭潘王士誠等寇晉冀白不信大刀敖李喜喜等趨關中

毛貴據山東其勢益振秋七月癸未太白犯鬼甲申太陰犯斗丁

亥填星犯鬼已丑鎮守黃河義兵萬戶田豐叛陷濟寧分院實理

門遁義兵萬戶孟本周攻之豐敗走本周還守濟寧甲午以完者

帖木兒為中書右丞俺普參知政事立四方獻言詳定司歸德知

府林茂萬戶時公權叛以城降賊曹州亦陷王堂鑑綱云是月大都晝霧白

五日輟耕錄云胡仲彬乃杭州演說野史者捐粟注授巡檢是年七月內招募游食之徒文其背

曰赤心護國誓殺紅巾將作亂為人首告搜其書名簿得二冊縱以一冊到餘火之亦誅三百六十

餘八月癸卯填星犯鬼太白犯軒轅癸丑劉福通兵陷大名遂自

曹濮犯衛輝答失拔都魯遣子孛羅帖木兒分兵擊走之甲子太

陰犯五車乙丑以方國珍為江浙參政海道運糧萬戶如故朱元

璋兵取揚州張士誠為書詣江浙請降達識帖睦爾遣參政周伯

琦至平江撫之詔以士誠為太尉士誠留伯琦不遣九月丙子以

老的沙平章政事兼元良海牙指揮使甲午澤州陵川陷縣尹張

輔歿之戊戌太不花復大名路并所屬郡縣辛丑加紐的該太尉

總諸軍守東昌倪文俊謀殺其主徐壽輝不果自漢陽奔黃州為

壽輝部將陳友諒所殺友諒并其軍自稱平章閏月癸卯有飛星

如孟青色光燭地尾長尺餘起自王良沒于勾陳丙午太陰犯斗
庚申犯井乙丑潞州陷冬十月乙亥熒惑犯氏甲申太陰掩昴劉
福通黨畧興元遂圍鳳翔察罕帖木兒李思齊擊破之賊走入蜀
答失拔都魯討曹州賊軍敗知樞密院事答里麻失里歿之靜江
路山崩地陷十一月辛丑汾州桃花戊午以答蘭平章政事李
獻為中書左丞八都麻失里為右丞卜顏帖木兒哈刺那海崔敬
陳敬伯並參知政事十二月庚午熒惑犯天江戊寅太白犯歲星
甲申太陰犯鬼丁亥歲星犯壘壁陣庚寅太白犯壘壁陣癸巳太
陰犯心丁酉象山縣鵝鼻山崩己亥流星如金星大尾長三尺餘
起自太陰近東而沒化為青白氣庚子答失拔都魯卒于軍是歲
趙均用彭早住同據淮安趙僭稱永義王彭僭稱魯淮王義兵千
戶余寶殺知樞密院事寶童叛降于毛貴據棣州自後太廟四祭

皆闕

十八年戊戌春正月辛丑填星犯鬼丙午太陰犯昴陳友諒陷安
慶淮南行省右丞余闕歿之庚戌朱元璋兵取婺源州及建德路
乙丑大風起自西北仆益都土門萬歲碑丙寅田豐陷東平路命
答失拔都魯子孛羅帖木兒為河南行省平章領其父軍分命察
罕帖木兒屯陝西李思齊屯鳳翔二月己巳朔立團結西山寨大
小十一處設萬夫千夫百夫長分守要害毛貴陷青滄州進據長
蘆鎮分戶部寶鈔庫等官于陝西就近造鈔以給軍癸酉毛貴陷
濟南山東宣慰使董搏霄歿之時搏霄已拜河南右丞未之任乙亥填星犯鬼辛巳命
太不花為中書右丞相總兵山東壬午田豐復陷濟寧紐的該棄
東昌走丁亥察罕帖木兒遣兵復涇州平涼遂保鞏昌庚寅王士
誠自益都犯懷慶丁酉興元陷三月己亥朔日色如血庚子毛貴

陷般陽路辛丑大同夜黑氣蔽西方聲如雷少頃東北方有雲如火交射中天已而火光遍地空中作兵甲聲癸卯王士誠陷晉寧路總管杜賽因不花歿之甲辰察罕帖木兒遣兵復晉寧庚戌毛貴由河間趨直沽遂破薊州掠柳林樞密副使達國珍戰歿徵四方兵入衛同知樞密事劉哈刺不花由彰德以兵拒戰于柳林貴衆潰仍走濟南丙辰冀寧路及大同諸縣陷夏四月甲申應作陳友諒據江西省治壬午田豐由益都掠廣平退保東昌元帥方脫脫以兵復廣平辛卯太白犯鬼甲午陳友諒遣王奉國陷瑞州是月察罕帖木兒李思齊會宣慰使張良弼等兵討李喜喜于鞏昌喜喜敗入蜀察罕駐清湫思齊駐斜坡良弼駐秦州郎中郭擇善駐崇信宣慰同知拜帖木兒駐通渭平章定住駐臨洮各自除官屬徵納軍需既而思齊良弼襲殺拜帖木兒分其兵五月戊戌朔

察罕帖木兒遣將復冀寧自以劉尚質為冀寧路總管李思齊擅殺郭擇善庚子劉福通攻汴梁守將竹貞棄城遁福通入城自安豐迎偽主韓林兒居之以為都壬寅太白犯填星庚戌陳友諒陷吉安路壬子太陰犯斗癸丑御史七十等糾右丞相太不花緩師拒命詔削其官爵安置蓋州命知行院事悟良哈台代之節制河北軍河南平章周全節制河南軍辛酉陳友諒兵陷撫州六月戊辰朔通考云日食太不花伏誅察罕帖木兒調部將虎林赤關保同守潞州授察罕帖木兒陝西行省平章便宜行事乙酉命左丞相太平督諸軍守京城秋七月丁酉朔周全據懷慶叛降於劉福通殺守將伯帖木兒盡驅懷慶民渡河入汴梁丁未太陰犯斗戊申太白書見已未劉福通遣周全引兵攻洛陽守將登城以大義責全全媿謝退兵劉福通殺之八月壬申太陰掩心甲申掩昴陳友諒兵

陷建昌路義兵萬戶王信以滕州叛降於毛貴庚寅以老的沙爲御史大夫九月丁酉朔褒封唐劉蕡爲文節昌平侯劉福通分兵踰太行焚上黨破遼州大掠興和塞外諸郡乙丑陳友諒陷贛州參政全普庵撒里及總管哈海赤死之冬十月己卯太陰犯昴壬午監察御史燕赤不花劾右丞相搠思監奸貪誤國詔收其印綬以紐的該爲左丞相十一月乙未朔田豐陷順德路陳友諒陷汀州丙午太陰犯昴太白犯房辛酉太陰掩心十二月乙丑朔日食癸酉劉福通黨陷上都焚宮闕轉畧遼陽遂至高麗上都爲累朝巡幸之所至是不復時戊寅太白經天庚辰察罕帖木兒遣樞密院判瑣住進兵遼陽癸未太白經天甲申朱元璋兵取蘭溪州及婺州路達魯花赤僧住廉訪使楊惠死之戊子太陰犯房是歲大饑疫兩河山東斗米金一斤民流入京師死者二十餘萬人宦者朴不花請市地收瘞

之

十九年己亥春正月甲午朔陳友諒遣將王奉國寇信州路江東廉訪副使伯顏不花的斤往救死之辛丑太陰犯昴乙巳以朶兒只班平章政事丙午遼陽行省陷懿州路總管呂震死之察罕帖木兒遣樞密院判陳秉直八不沙將兵二萬守冀寧癸丑流星如酒盃大有聲如雷二月辛巳叛將梁炳攻辰州參政和尚擊敗之甲申賊由飛狐靈邱犯蔚州庚寅詔孛羅帖木兒移鎮大同捍蔽京師復置大都督兵農司并分司十道專督屯糧卽以孛羅領之保定河間不勝其擾三月癸巳朔陳友諒畧衢州復分兵陷襄陽庚戌太陰犯房壬戌定科舉流寓人名額蒙古色目南人各十五名漢人二十名夏四月癸亥朔毛貴爲趙均用所殺帝以天下多故卻天壽節朝賀禮太子率羣臣再三奏請帝曰朕闕於修省致

萬姓塗炭今復朝賀燕集是重朕不德也俟天下安寧行之未晚

卒不聽已丑賊陷寧夏遂畧靈武等處五月通考云丁亥朔日食本紀作壬辰朔不言日食丙申

熒惑犯鬼丁酉皇太子請巡北邊綏撫軍民御史臺上疏固留帝

從之丙午太陰犯天江丁未犯斗以八月鄉試河南舉人及避兵

儒士不拘籍貫依河南省元額就陝州置貢院應試秋七月壬辰

朔黜搆思監為遼陽左丞相丁酉太白犯上將甲辰犯右執法已

酉犯左執法命國王囊加帶等統軍征遼陽丙辰毛貴黨續繼祖

自遼陽入益都執趙均用殺之八月辛酉朔察罕帖木兒大發秦

晉軍攻汴梁破之劉福通奉偽主韓林兒復走安豐詔察罕帖木

兒為河南行省平章兼同知行樞密院西臺中丞依前便宜行事

九月癸巳禁軍人私殺牛馬以察罕腦兒宣慰司地隸資政院有

司不得差占其地在世祖時屬忙哥台太子四子戶今從皇后奇氏請故改隸之丙午夜白虹貫天甲寅太白

犯天江朱元璋兵取衢處二州遣尚書伯顏帖木兒曹履亨以御

酒龍衣賜張士誠徵海運糧時中原既亂江南海漕久不至京師銀一錠易米八斗民大饑至是河南始通故往徵之冬十月

庚申朔詔京師諸門築甕城造弔橋以方國珍為江浙平章壬申

太白犯斗辛巳流星大如桃陳友諒兵陷杉關十二月戊辰太白

犯壘壁陣時太子欲撫軍憾左丞相太平不從殺中書左丞成遵

參知政事趙中以太平舉用之人誣以賊罪下獄杖殺之陳友諒以江州為都迎偽主徐壽輝

居之自稱漢王是歲山東河南關中飛蝗蔽天人馬不能行落溝

塹盡滿綱目云大都有杜鵑 較耕錄云至正乙亥十二月金陵游軍斬關突至杭城閉城三月餘城中米價一斗直二十五緡數日米盡槽糠亦與常日米價等又數日槽糠盡乃以油車家糠餅搗屑啖之餓死十六七

二十年庚子春正月己丑朔改鞏縣為軍州萬戶府招民屯種已

亥太陰犯井癸卯大寧路陷壬子以絆住馬平章政事危素參知

政事丙辰五色雲見二月戊午朔左丞相太平罷尋為上都留守

穀耕錄云至正庚子二月六日浙西諸郡
雷擊電雪大作頃刻積深尺餘雷不止三月戊子朔田豐陷保定彗星見東

方乙巳冀寧陷壬子復以搠思監為右丞相夏四月丁卯太陰犯
明堂癸酉犯東咸僉行樞密院事張居敬復興中州五月丁亥朔
日食陳友諒殺其偽主徐壽輝自稱帝國號漢改元大義已而回
駐江州遣兵陷辰州壬寅太陰犯建星張士誠海運糧十一萬石
至京師六月己丑察罕帖木兒與孛羅帖木兒爭晉冀互相讎殺
帝下詔令各守信地毋得越境侵犯癸巳太白犯井戊戌太陰犯
建星秋七月辛酉孛羅帖木兒敗王士誠于臺州乙丑太陰犯井
乙亥詔孛羅帖木兒統領達達漢軍仍便宜行事八月戊子命孛
羅帖木兒守石嶺關以北察罕帖木兒守石嶺關以南關在太原府東辛卯
太陰犯天江壬辰填星犯太微乙未永平路陷甲辰太陰犯井詔
在外權攝官專務殘虐百姓今後非朝命不得之任九月乙卯朔

孛羅帖木兒調兵白石嶺關直抵冀寧圍其城三日退屯交城察
罕帖木兒調參政閻奉先引兵與戰相持各不下帝遣參政也先
不花前往和解壬戌賊陷孟州由趙州攻真定復犯上都右丞忙
哥帖木兒與戰敗績冬十月甲申朔甘露降于國子監大成殿前
栢木以張良弼為湖廣參政規取荆襄戊子熒惑犯井詔孛羅帖
木兒守冀寧遣軍倍道至守者不納己亥察罕帖木兒遣陳秉直
瑣住等以兵攻孛羅之軍于冀寧與其部將脫列伯戰敗之時帝
有旨以冀寧界孛羅察罕不從渡河就屯澤潞拒之十一月甲寅
朔黃河清三日詔太廟影堂祭祀乃子孫報本重事近者兵興歲
歉品物不能豐備累朝四祭減為春秋二祭今宜復四祭寃不果
行

二十一年辛丑春正月癸丑朔詔赦天下遣使諭孛羅帖木兒察

罕帖木兒各罷兵還鎮

時字羅縱兵掠冀寧察罕引兵拒之故有是詔

庚申太陰犯歲星丁卯李

思齋進兵平伏羗等縣癸酉石州大風拔木六畜俱鳴民間槍刃

生火焰抹之即無搖之則有二月癸未朔填星退犯太微垣甲申

同僉樞密事迭里帖木兒復永平灤州壬寅太陰犯天江廣東廉

訪使八撒刺不花殺本省廉訪使完者篤副使李思誠僉事迭麥

赤以兵據廣州

時八撒刺不花久任廣東專權自恣朝廷患之乃以完者篤代其任而除八撒刺南臺侍御史八撒刺不受命遂激成變

三月丙辰

太陰犯井庚辰熒惑犯鬼張士誠海運糧十萬石至京師李羅帖

木兒罷兵還遣脫列伯等引兵據延安謀入陝詔張良弼出南山

義谷駐藍田聽察罕帖木兒節制良弼陰結陝西平章定住俟丞

相帖里帖木兒調遣營于鹿臺察罕啣之夏四月辛巳朔日食

遣其子副詹事擴廓帖木兒貢糧至京師值太子親與定約急圖

錄云至正辛丑四月朔日未沒忽然無光大昏黑如夜星斗燦然久之方復舊天再開星斗亦隱又少時日乃沒調張良弼為陝西參政察罕

出師五月癸丑明玉珍陷嘉定等路壬戌太陰犯房癸酉太白犯

軒轅甲戌熒惑犯太白乙亥李思齋受李武崔德等降六月乙未

熒惑歲星太白聚于翼丙申察罕帖木兒總兵討山東發晉軍下

井陘出邯鄲過磁相懷衛踰白馬津水陸並進戊戌太陰犯雲雨

甲辰太白晝見秋七月

通考云辛酉朔日食

辛亥察罕帖木兒平東昌復冠州

已巳忻州西北及大同路北有赤氣蔽天如血八月乙酉察罕帖

木兒遺擴廓帖木兒閻思孝等討田豐直搗東平大破之豐降令

為前鋒從大軍東討棣州俞寶東平王士誠東昌楊誠濟南劉珪

等皆降魯地悉定引兵圍益都陽翟王阿魯輝帖木兒謀逆伏誅

冬十月癸巳絳州有赤氣見北方如火命察罕帖木兒為中書平

章政事兼知河南山東行院事陝西行臺中丞察罕調降將劉珪

等守河南十一月庚戌太陰犯建星癸亥犯井壬申犯氏黃河自

平陸三門磧下至孟津五百里皆清凡七日綱鑑大全云命秘書少監程徐記之察罕帖

木兒李思齊遣兵圍鹿臺攻張良弼詔各還信地兵乃解是歲京

師屯田成收糧四十萬石賜司農丞胡秉彝上尊金幣旌其功餘

各賜鈔有差江鄰幾雜志云是年明州松樹結實其大有盈尺者

二十二年壬寅春正月戊申朔太白犯建星甲寅分命李思齊討

四川張良弼平襄漢思齊退保鳳翔不行時思齊附察罕而良弼附李羅兩軍不和故有是命乙亥

填星退犯左執法二月己卯太白犯壘壁陣乙酉彗星見于危光

芒長丈餘色青白丁酉犯離宮西星至月終光芒長二丈餘三月

戊申彗星不見星形惟有白氣形曲竟天西指掃大角壬子彗星

行過太陽前惟有星形無芒在昴宿至戊午始滅甲寅明玉珍陷

雲南省治陝西參政車里帖木兒擊敗之擒其弟明二己未命李

羅帖木兒為中書平章政事加太尉李思齊復遣兵攻張良弼伏

武功良弼伏兵大破之諭良弼聽李羅節制夏四月丙子朔長星

見其形如練長數十丈在虛危之間四十餘日乃滅丁亥熒惑離

太陽三十九度不見當出不出五月乙巳朔閩賊賽甫丁據福州

路平章燕只不花擊敗之餘眾航海還據泉州福建參政陳有定

一作友定復汀州路辛酉太陰犯建星辛未明玉珍據成都自稱隴蜀

王張士誠海運糧十三萬石至京師六月辛巳彗星見紫微垣光

芒長尺餘東南指西南行戊子彗星光芒掃上宰降賊田豐王士

誠刺殺察罕帖木兒走入益都詔以其子擴廓帖木兒襲父職總

其軍仍諭將士力圖報復以伸大義秋七月乙卯彗星滅跡丙辰

熒惑見西方須臾成白氣如長蛇光炯有文橫亘中天移時乃滅

河決范陽縣八月癸巳太白犯畢九月癸卯朔劉福通以兵援田

豐至火星墀擴廓帖木兒邀擊大破之丁未太白犯亢己酉太陰

犯斗辛

史誤作丁

亥歲星犯軒轅丙寅熒惑犯鬼巳巳有流星如酒杯

色青白光明燭地冬十月壬申朔命江西平章朶列不花分省廣

州執叛臣八撒刺不花殺之甲戌李羅帖木兒南侵擴廓帖木兒

分地據真定路己卯太陰犯牛丁亥辰星犯亢戊子太陰犯畢十

一月乙巳擴廓帖木兒拔益都田豐王士誠伏誅擴廓取其心以

以祭父庚戌擴廓帖木兒遣關保復莒州山東悉平詔加擴廓太

尉便宜行事癸亥四川賊陷青州十二月壬辰太陰犯角庚子以

佛家奴爲御史大夫加封唐撫州刺史南庭王危全諷爲南庭忠

烈靈惠王是歲黃河自河東清者千餘里帝聞之不樂曰黃河清

聖人生當有代朕者羣臣曰今太子生子陛下聖孫卽其應也帝

笑而頷之

二十三年癸卯春正月壬寅朔明玉珍僭稱帝于成都國號夏紀

元天統庚申歲星犯軒轅二月戊戌太白晝見庚子擴廓帖木兒

自益都領兵還河南留瑣住守之張士誠遣將呂珍入安豐殺劉

福通據其城三月辛丑朔彗星見東方經月乃滅命中書平章愛

不花分省冀寧擴廓帖木兒遣兵據之內辰太白犯氏壬戌大同

路夜有赤氣亘天中侵北斗立廣西行中書省以廉訪使也兒吉

尼爲本省平章

時南方郡縣皆陷惟也兒吉尼獨保廣西者十五年

夏四月辛丑熒惑犯歲星庚申

歲星犯軒轅李羅帖木兒與李思齊構兵不已擴廓帖木兒遣貊

高等以兵擊張良弼詔李羅速進兵討襄漢五月己巳朔張士誠

海運糧十三萬石至京師壬午太白晝見乙未熒惑犯右執法六

月戊戌朔李羅帖木兒遣方脫脫匡福于彰德擴廓帖木兒遣

兵追之敗還匡福遂據保定己亥擴廓帖木兒部將歹驢等駐兵

藍田七盤李思齊圍興平據蓋屋李羅帖木兒旣奉詔討襄漢道

阻不得下戊申李羅帖木兒遣竹貞等入陝西據省治擴廓帖木
兒遣部將貊高與李思齊合攻之竹貞出降庚戌星隕于濟南龍
山入地五尺乙卯太白犯井丁巳絳州有白虹二道衝斗牛庚申
平陽路有白氣三道貫北極北斗天漢壬戌太白晝見夜犯井秋
七月戊辰朔以袁宏馬良參知政事乙酉太白晝見有星墜于慶
元路西北聲如雷光數十丈八月丁酉朔倭寇蓬州守將劉暹擊
走之壬寅太白犯軒轅乙巳太陰犯建星丁未太白犯軒轅己酉
太白晝見丙辰太陰犯畢沂州有赤氣亘天中有白色如蛇形徐
徐西行至夜分乃滅己未太白晝見辛酉太白犯歲星乙丑犯右
執法偽漢陳友諒與朱元璋大戰鄱陽湖敗死其子理自立仍據
武昌爲都改元德壽九月辛未太白犯左執法乙亥歲星犯右執
法丁丑辰星犯填星丁亥太白犯填星辰星犯亢張士誠自稱吳

王卽平江治宮室遣侍郎博羅帖木兒再徵糧士誠不應東南海
運遂絕冬十月丙申朔山東赤氣千里癸卯太白犯氏二皇后惡
丞相太平令監察御史米只兒海牙劾之本傳作御史大夫普化詔安置太平
于土番未至逼令自殺戊午太白犯房擴廓帖木兒遣僉院事任
亮復安陸府李羅帖木兒遣兵攻冀寧至石嶺關擴廓破走之擒
其將烏馬兒殷興祖李羅軍由是不振十一月癸未太陰犯軒轅
歲星犯右執法詔復故丞相脫脫所授宣命是歲御史大夫老的
沙與知樞密院事禿堅帖木兒得罪于太子奔大同李羅帖木兒
匿之軍中

二十四年甲辰春正月戊寅太白犯軒轅庚辰保德州民家產豬
一頭兩身朱元璋改稱吳王自將伐漢偽漢主陳理降悉有湖廣
江西之地二月壬子歲星犯左執法癸丑太陰犯西咸池三月辛

卯時太子惡孛羅帖木兒匿老的沙秃堅帖木兒乃以帝詔削孛羅官爵奪其兵孛羅拒命不受夏四月甲午朔日食既又以帝詔命擴廓帖木兒討孛羅帖木兒孛羅知非出帝意皆右丞相搠思監宦者朴不花所爲遂令秃堅帖木兒舉兵犯闕入居庸關知院事也速詹事不蘭奚迎戰敗績甲辰命太子率侍衛兵出古北口東趨興松乙巳秃堅帖木兒兵至清河列營都城大震使達達國師至其軍問故以必得搠思監朴不花爲辭帝不得已執與之丁未詔復孛羅帖木兒官爵總兵如故以也速爲左丞相庚戌秃堅帖木兒陳兵自健德門入覲帝于延春閣慟哭請罪帝宴賚之加孛羅帖木兒太保仍守大同秃堅帖木兒進中書平章政事辛亥秃堅帖木兒請還軍太子至路兒嶺詔追回宮癸丑太白犯井五月戊辰皇太子促擴廓帖木兒討孛羅帖木兒屯兵冀寧分三道

東道以白鎖住領兵三萬守京師中道以貊高竹貞領兵四萬西道以關保領兵五萬合擊之關保等兵逼大同孛羅留兵拒守而自率兵與秃堅帖木兒老的沙復大舉向闕甲戌太白犯鬼乙亥歲星犯左執法六月癸卯三星晝見白氣橫突其中甲辰河南府有大流星向南方光如晝丁未大星隕照夜如晝及旦黑氣晦暗如夜甲寅白鎖住以兵至京師固請太子西行丁巳太白犯右執法保德州黃龍見井中秋七月癸亥太白歲星合于翼甲子歲星犯左執法丙戌孛羅帖木兒前軍入居庸關命太子率諸軍禦于清河也速軍于昌平軍士不戰而潰散太子馳還都城白鎖住引兵扈之星夜取道雄霸河間往冀寧戊子孛羅帖木兒駐兵健德門與秃堅帖木兒老的沙入見帝于宣文閣訴其非罪皆泣帝亦泣賜宴如初庚寅命孛羅帖木兒爲左丞相老的沙平章政事秃

堅帖木兒爲御史大夫也速知樞密院事帝曰孛羅擴廓俱朕股肱視同心膂自今各釋宿忿弼成大勳八月壬辰朔日食乙未熒惑犯鬼乙巳太子兵至冀寧乙卯張士誠逐達識貼睦邇以其弟士信代爲江浙左丞相南臺御史大夫普化帖木兒不從歿之達識貼睦邇亦仰藥歿孛羅帖木兒既當國請誅狎臣罷三宮不急造作汰宦官減錢糧禁西番僧作好事數遣使請太子還宮使至太原太子拘留不報九月辛酉朔宦官思龍宜潛送宮女伯忽都出順承門達冀寧行帳乙丑太白晝見癸酉夜西北有紅光至東而散甲申太陰犯軒轅冬十月丙午太陰犯畢己酉犯井己未詔諭太子還京師命也速老的沙分道總兵十二月乙卯太陰犯太白輟耕錄云松江近海湖泖素不通潮至正甲辰秋冬間水忽平擁起高三四尺若潮漲勢平江嘉興亦如之

二十五年乙巳春正月癸亥封李思齊爲許國公丙寅太白晝見

甲戌太白犯建星二月辛丑汴梁路見日旁有一月一星輟耕錄云至正乙巳

遣翰林應奉李國鳳抵汴城望祭嵩嶽二月十三日仰視日旁一月一星月初初者又十日雨木冰狀如樓閣人物鳥獸舟木俱備高林大樹珠葆羽幢彌望不絕凡五日始解又十日復冰自汴至中丙午太陰犯填星三月庚申朔太子在冀寧下令軍中曰

孛羅帖木兒襲據京師余既受命總督天下諸軍恭行顯罰少保平章擴廓帖木兒躬勒將士分道進討諸王駙馬及陝西平章李思齊等各統軍馬尚其奮義戮力尅期恢復丙寅孛羅帖木兒聞太子討已幽置二皇后奇氏于諸色總管府丁卯以火尼赤別帖木兒並爲御史大夫戊辰太白犯壘壁陣夏四月庚寅孛羅帖木兒脅奇氏令還宮取印章僞爲后書遣太子遣內侍完者禿持往冀寧復出幽之乙巳關保等兵入大同壬子熒惑犯靈臺五月辛酉熒惑犯太微垣甲子京師雨雹毛之強曲者曰雹長尺許或言于帝曰龍絲也命拾而祀之六月戊子以黎安道叅知政事乙巳皇后奇氏

還宮乙卯皇太子加李思齊邠國公秋七月丁丑填星歲星熒惑聚于角亢己卯太陰犯畢乙酉孛羅帖木兒伏誅禿堅帖木兒老的沙北遁丙戌遣使函孛羅首往冀寧卽召太子還其黨黎安道方脫脫雷一聲皆棄市河決小流口達于清河八月丁亥朔京城門閉者三日竹貞貂高命軍士緣城而上碎平則門鍵大掠都市乙未太陰犯建星己亥太白犯壘壁陣癸卯復命太子分調將帥戡定未復郡邑承制用人並准正授丁未皇后宏吉刺氏崩壬子以洪寶寶帖古思不花捏烈禿並平章政事擴廓帖木兒扈從同太子至大都九月丁丑太陰犯井壬午命伯撒里爲太師右丞相擴廓帖木兒爲太尉左丞相錄軍國重事以方國珍爲淮南左丞相分省慶元冬十月辛卯熒惑犯天江壬寅以哈刺章知樞密院事丁未益王渾都帖木兒擒老的沙誅之禿堅帖木兒走八兒思

之地命嶺北左丞相山僧追討之戊申以禿魯爲御史大夫己酉熒惑犯斗太陰犯右執法庚戌犯太微垣閏月庚申詔張良弼俞寶孔興等悉聽擴廓帖木兒調遣戊辰太白辰星熒惑聚于斗太陰犯畢辛未封擴廓帖木兒河南王以代太子親征總制關陝晉冀山東迤南一應軍馬聽便宜行事壬申太白犯歲星辛巳以脫脫木兒爲中書右丞達識帖木兒爲參知政事十一月己丑太白犯熒惑太陰犯壘壁陣丙申犯畢癸卯犯太微垣十二月乙卯立高麗女奇氏爲皇后改賜肅良哈氏癸亥太陰犯畢庚午歲星掩房辛未太陰犯右執法禿堅帖木兒伏誅是歲遣侍郎滿尚賓掩篤刺哈至鳳翔持詔諭李思齊開通川蜀道路思齊方兵爭不奉詔留尚賓等不還

二十六年丙午春正月己酉命沙藍答里爲左丞相孛羅沙脫脫

不花並爲御史大夫完者木知樞密院事壬子增燕南河南山東
陝西河東舉人會試者額進士及第以下遞升官一階二月癸丑
朔立河淮水軍元帥府于孟津甲戌以內難平凡經值軍馬之地
與免雜泛差徭命擴廓帖木兒還河南分省部自隨統制各處軍
馬收復中原調陝西張良弼兵不應是月黃河北徙自東明曹濮
下及濟寧民皆被害三月丁亥白虹五道亘天其第三道貫日又
有氣橫貫東南良久甲午擴廓帖木兒遣關保等西攻張良弼于
鹿臺李思齊脫列伯孔興等與良弼連兵拒之僞夏主明玉珍歿
夏六月壬子朔介休縣地震平遙縣大雨雹山陰縣臥龍山裂秋
七月辛巳朔日食徐溝縣地震石州大星如斗自西南而落甲午
太白經天擴廓帖木兒分兵屯河中遣關保虎林赤合兵渡河約
李思齊共攻張良弼思齊仍與良弼合連兵拒守丙午太白經天

八月戊寅以李國鳳爲中書左丞授陳有定爲福建行省平章九
月丙戌加方國珍爲江浙左丞相其弟國瑛國珉姪明善並爲行
省平章辛丑孛星見東北方冬十月甲子擴廓帖木兒遣其弟脫
因帖木兒及顏高完哲等駐兵濟南控制山東十二月庚午蒲城
洛水和順崖崩是歲吳王朱元璋兵取淮安高郵徐邳潁泗及湖
杭二州紹興嘉興諸路皆張士誠竊據者僞宋主韓林兒歿

二十七年丁未春正月乙未絳州天鼓鳴聲如戰鬪李思齊張良
弼脫列伯會于含元殿基衆推思齊爲盟主同拒擴廓帖木兒二

月

通考云朔日食

庚申以月魯不花月魯帖木兒並爲御史大夫三月丁丑

朔萊州大風海鳥至其翅如席庚子京師大風飛砂揚礫白日昏
暗夏五月丙子朔白氣二道亘天大同隕霜殺麥乙酉以完者帖
木兒爲右丞相俺普平章政事辛丑擴廓帖木兒定擬所屬官二

千六百一十員詔從其請李思齊遣張良弼部將郭謙守黃連寨
虎林赤竹貞商嵩引兵攻之不克思齊遂據長安六月丙午朔日
食晝晦丁巳皇太子寢殿後新發井中有龍出光焰爍人宮人驚
懾仆地長慶寺有龍纏繞槐樹飛去樹皮皆剝丁卯沂州山崩秋
七月丁酉絳州星隕光耀如晝李思齊遣將許國佐會張良弼脫
列伯兵屯華陰又遣將鄭應祥守陝西自還鳳翔龍見于臨朐龍
山大石起立八月丙午再命太子總制天下兵馬詔曰元良重任
職在撫軍稽古徵今卓有成憲曩者障塞決河本以拯民昏墊豈
期妖盜橫造訛言簧鼓愚頑塗炭郡邑殆遍海內茲逾一紀故察
罕帖木兒仗義興師獻功敵愾汎掃汴洛克平青齊爲國捐軀深
可哀悼其子擴廓帖木兒克繼先志用成駿功會太子愛猷識理
達臘計安宗社累請視師朕以國本至重詎宜輕出遂授擴廓帖

木兒總戎重寄畀以王爵俾代共行豈意李思齊張良弼等各懷
異見構兵不已以致盜賊愈熾深遺朕憂况全齊密邇輦轂儻失
早計恐生異圖詢諸衆謀僉謂皇太子聰明仁孝文武兼資聿遵
舊典爰命以中書令樞密使悉總天下兵馬一應軍機政務生殺
予奪事無輕重如出朕裁其擴廓帖木兒領本軍自潼關以東肅
清江淮李思齊自鳳翔以西進取川蜀以少保禿魯爲陝西行省
左丞相總本部及張良弼孔興脫列伯等各軍進取襄樊山東行
省平章王信以本軍固守沂州詔書到日汝等悉宜洗心滌慮同
濟時艱毋替朕命詔書雖下而太子不果行擴廓帖木兒亦不奉
命于是其部將貊高關保皆叛殺衛輝彰德守禦官上言擴廓不
遵君命無人臣禮臣等不能俛首聽命詔削擴廓帖木兒官罷其
兵柄就命貊高討之壬子仍令太子立大撫軍院以右丞相完者

元史卷一百一十五 順帝 五十一 順帝 五十一 順帝 五十一

帖木兒翰林承旨答爾麻平章政事完者帖木兒並知撫軍院事
九月甲戌朔命丞相也速分省山東沙藍答里分省大同丁亥當
丑以兵興迤南供億繁重真定河南陝西山東冀寧諸處與免民
間今年田租之半其餘雜泛一切住罷吳王朱元璋取平江路執
張士誠以歸士誠自縊歿冬十月甲辰朔命也速會貊高攻擴廓
帖木兒于真定不克王子詔落擴廓帖木兒太傅左丞相及兼領
諸職仍前河南王其帳前諸軍命鎖住虎林赤統之河南諸軍李
克彝統之山東諸軍也速統之山西諸軍沙藍答里統之河北諸
軍貊高統之關保仍統本部軍如故擴廓退軍澤州甲寅以火里
赤丁好禮並平章政事十一月壬午吳王朱元璋兵取沂州平章
王信遁癸未取慶元路方國珍迎降分兵由海道入福州取邵武
建寧延平諸路執陳有定以歸有定不屈歿辛丑益都陷宣慰使

普顏不花總管胡濬知樞密院張俊皆歿之十二月癸卯朔日食
甲子命右丞相也速等會國公楊誠陳秉直各部軍同守山東詔
李思齊爲副總統守關中脫列伯孔興出潼關渡河合勢東行共
勤王事思齊等不奉命詔分潼關以西屬思齊東屬擴廓帖木兒
各罷兵還鎮於是關保退屯潞州商嵩留屯潼關

二十八年戊申春正月壬申朔命太子敕關保固守晉寧總統諸
軍如擴廓帖木兒拒命當以大義相裁就便擒擊辛巳詔諭擴廓
帖木兒曰比者也速上奏卿以書陳情深自悔悟及省來意良用
惻然朕視卿猶子卿何惑於儉言不體朕心隳其先業卿今能自
悔固朕所望其思昔日委任肅清江淮之意卽將冀寧真定諸軍
就行統制渡河直擣徐沂以康靖齊魯則職任之隆當悉還汝衛
輝彰德順德皆爲王城卿無以貊高爲名縱軍侵暴其晉寧諸軍

命關保總制策應戡定山東將帥各宜悉心庚寅彗星見于昴
畢之間是月吳王朱元璋卽帝位建國號曰大明二月壬寅朔復
削擴廓帖木兒爵邑命禿魯李思齊等討之癸卯武彗災癸丑明
兵取東昌路守將申榮王輔元歿之丙辰擴廓自澤州退守晉寧
關保守澤潞二州與貊高軍合明兵至河南李思齊張良弼等解
兵西還三月庚寅彗星見西北有星流于東北衆小星隨之其聲
大震明兵取河南李思齊張良弼會兵駐潼關明兵入潼關思齊
奔鳳翔夏五月庚午朔李克彝棄河南城奔陝西推李思齊爲帥
駐兵岐山思齊部將虎林赤脫列伯張意等據盩厔商崑據武功
李克彝據岐山任從政據隴州六月庚子朔雷雨中奮火自天墜
焚大聖壽萬安寺壬戌臨州保德州地震五日不止明兵下湖南
兩廣悉定秋七月癸酉京城紅氣滿空如火照人自旦至辰方息

乙亥京城黑氣起百步內不見人貊高關保以兵攻晉寧閏月己
亥朔擴廓帖木兒擒貊高關保遣其斷事官以聞帝不得已詔貊
高關保間謀搆兵卽依軍法誅之辛丑明兵由衛輝彰德取廣平
路丁巳詔罷大撫軍院復命擴廓帖木兒仍前太傅左丞相統領
見部軍馬由中道直抵彰德衛輝右丞相也速統大軍徑山東道
水陸並進陝西左丞相禿魯率關陝諸軍東出潼關攻取河洛平
章李思齊領本部軍南出七盤金商克復汴梁四道進兵犄角勦
捕毋分彼此平章俺普瑱住等軍東西布列乘機掃殄遼陽左丞
相也先不花郡王知院厚孫等軍捍禦海口藩屏畿輔以太子愛
猷識理達臘悉總天下兵馬裁決庶務具如前詔壬戌白虹貫日
始罷內府興造甲子擴廓帖木兒自晉寧退守冀寧明兵至通州
知樞密院事卜顏帖木兒力戰歿右丞相失列門傳旨奉太廟列

室神主並隨太子北行乙丑白虹貫日詔准王帖木兒不花監國
 慶童為左丞相留守京城丙寅帝御清寧殿集三宮后妃及太子
 并太子妃同議避兵失列門及知院事黑厮宦者趙伯顏不花等
 諫不聽伯顏不花慟哭曰天下者世祖之天下陛下當以死守奈
 何棄之臣等願率軍民及諸怯薛友出城拒戰卒不聽至夜半開
 健德門北奔草木子云至正戊申七月有一餓鴉鳴瑞明殿上帝命射之終莫能中俄常遇
 春等統兵至柳林去京甚近帝召百官會議瑞明殿及開門忽有二狐自殿上出
 帝嘆曰宮禁嚴密此物何得至此始
 天所以告朕朕其可留哉遂命北狩八月庚申鴻猷等錄作八月二日申當作午明兵入京城國亡後
 一年帝駐于應昌府又一年四月丙戌始殂壽五十一太尉完者
 院使觀音奴奉梓宮北歸五月癸卯明兵襲應昌皇孫買的里八
 刺及后妃皆被獲時太子愛猷識理達臘從十數騎去明主以帝
 知順天命特加號順帝封買的里八刺為崇禮侯歷代建元考云順帝駐
 應昌一年而殂國人諡
 曰惠宗太子嗣立改元宣光凡十一年諡曰昭宗按高麗史云順帝北走駐應昌太子愛猷識理
 達臘嗣立從和林改元宣光稱北元時洪武十年也明年豆叱仇帖木兒立北元遣使告高麗

又以改元天元告則繼順帝而建元者非止宣光矣 朔漢圖考云洪武元年八月明兵取燕都
 元主攜歷代傳國璽遁出塞三年殂于應昌太子愛猷識理達臘稱帝于漠北傳位于子脫古思
 帖木兒後為其下也速迭兒所弒其臣復立坤帖木兒為可汗建文三年殂以鬼力赤為可汗承
 樂改元屢遣書招諭不服八年車駕親征至斡難河十二年再征追至土刺河二十年三征次殺
 虎原會部長阿魯台弒其主本雅失里而自立數侵塞上宣德九年為及刺
 部所敗阿魯台走死部落盡離散及刺乃遣使入朝獻傳國璽而元始亡

用曰絕人巧智惟事荒恣綱紀懈弛用殄厥世稗史所稱非
 明宗嗣附會詔書事近曖昧

元史類編卷之十終

三

國宗編制會諸生集說題

國宗編制會諸生集說題

此編制會諸生集說題，其意蓋在編制國宗，以垂永久。夫國宗者，國之宗也。宗之編制，所以示統緒、正名分、明禮制、垂法則也。此編制會諸生，皆國之俊秀，其志在學，其行在德，其言在道。今集其說而編之，以垂永久，此編制會諸生集說題也。

